

唐

卷十六


T 2455/17

316

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

SEP 20 1932

ChL 2455,17



弘簡錄卷四十二

明刑部員外郎

皇清翰林院侍講學士四世孫遠平校閱



庶官 唐六之三 文吏

徐申 裴胃 于頔 盧徵 班宏

王紹 李巽 范傳正 戴叔倫 杜兼 從弟羔

李景略 任迪簡 樊澤 崔漢衡 韋臯 兄聿子正 貫附劉闢

林蘊 父披 郝士美 父純 嚴綬 辛秘 崔弘禮

王遂 王式 薛元賞 李福 劉潼 祖暹

崔安潛 從子彥曾 王凝

徐申字維降京兆人擢進士遷洪州長史曹王臯討李希烈檄  
行刺史事任職辦治遷韶州刺史兵興四十年刺史嘗居縣治

而令丞雜處民間申乃徙治故州募人墾廢公田歲入三萬斛計諸工庸授之未幾邑閑如初剗驛候作大市器用皆具治韶六年視始來時戶止七千比去倍而加半觀察使以狀聞遷合州刺史轉景州時方新置賜錢五十萬加節度副使遷邕管經略使黃洞納質供賦不敢桀踰年進嶺南節度使在任戢吏奸禁攻劫有職員百餘舊咸盜署畏事泄作亂覺而殺之外蕃至者未嘗賸索商賈饒盈劉闢反表發卒五千循馬援故道由夔蠻抵蜀擣其不備加檢校禮部尚書封東海郡公卒年七十贈太子少保諡曰平

裴胄字亂叔寬兄子擢明經授秘書正字轉秘書郎佐李抱王鳳翔幕府不得意謝歸更從宣歙陳少游授監察御史抱王怒劾貶桐廬尉浙西觀察判官許鴻謙重其學識一見器之薦於

觀察李栖筠復引為觀察支使轉殿中侍御史栖筠卒胄歸元載惡之復表少游淮南觀察判官載誅拜刑部員外遷宣州刺史楊炎伸舊惡貶汀州司馬稍遷國子司業充江西觀察使奏罷李兼月進衆推其才拜荆南節度使兼御史大夫時方剝下希慙中使過者即悉公帑市歡獨胄簡儉恆一待之有節無何卒年七十五贈尚書右僕射諡曰成議者尚以不慙劾貶書記梁從易以是譏之

于頔字休明河南人父庭謂濟王府倉曹參軍頔少以吏事聞授京兆士曹參軍為尹史翽所賞重從鎮襄漢奏為監察御史充判官翽被殺收葬遺骸時人義之第五琦領度支署河東租庸使累鳳翔少尹度支郎中兼御史中丞轉運租庸糧料鹽鐵等使以汴州轉運院累遇兵亂散失錢帛奏移河陰元載為諸

道營田使又署郎官親昵之令於東都汝州開置屯田歷戶部侍郎秘書少監太府卿代杜濟爲京兆尹以母憂解其爲政苛細無大體好在機數專候權要曲事元載其無勢利者視之蔑如載死出爲鄭州刺史遷河南尹代還盧杞以其柔佞易制薦爲御史大夫從幸奉天改左散騎常侍歷左千牛上將軍徙大理卿太子少保工部尚書致仕卒時年七十四  
盧徵范陽人家於鄭之中牟少涉獵書記劉晏辟爲從事委以腹心之任累殿中侍御史後貶珍州司戶興元中元琇薦爲京兆司錄轉度支員外郎琇得罪復貶秀州長史遷信州刺史入爲右司郎中遷給事中戶部侍郎與竇叅善倚以自代德宗惡叅出爲同州刺史數歲轉華州徵冀復用厚結中貴以近地人貧竭其財賦人不堪命卒年六十四

班宏衛州汲人祖思簡春官員外郎父景倩以儒名家官至秘書監國子祭酒宏少舉進士授右司禦曹叅軍歷薛景先鳳翔掌書記高適劔南觀察判官累大理司直攝監察御史理青城山妖賊張安居速殺之無使妄引人心大安代者郭英乂奏署秘書郎兼雜令以疾免大曆三年遷起居舍人兼理陜使四遷給事中使往成德軍問李寶臣疾子惟岳匿喪求襲厚賂不受還報合旨遷刑部侍郎兼考京官駁僕射崔寧署侍郎劉廼考上下以爲撫荒靖難專在節使尺籍伍符不校省司夫上行宣美之名則下開趨競之路上行阿容下必朋黨因削去之廼知而謝曰廼雖不敏敢掠一美以徼二罪乎尋改吏侍充吐蕃會盟副使貞元初仍歲旱蝗上以賦調爲急復改戶部侍郎副韓滉時竇叅方爲司直及領度支擢宏尚書上語以朕惟藉叅

爲重衆務悉委於卿叅又私許一年後卽當歸使後絕不復言  
遂多持異所委中丞徐粲主揚子院事頗不理且以賄聞叅欲  
代之宏執不可叅訪諸吏亦罕及宏有所疏列留中不下無何  
叅以使勞加吏部尚書而宏進封蕭國公益怨以虛號見寵因  
厚結權倖以傾叅宏每奉詔營建親程課役必極壯麗張滂先  
善於宏薦爲司農少卿叅欲令分掌江淮鹽鐵以滂素疾惡慮  
粲爲所繩因謂其強戾不可用滂聞不喜叅漸爲上疎將讓使  
於宏而不欲令專其務問計於京尹薛珽云二人方交惡若分  
鹽鐵轉運於滂必能制宏叅乃薦滂爲戶部侍郎鹽鐵轉運使  
而以宏判度支江淮兩稅悉宏主之置巡院官令二人共擇宏  
性剛愎滂請鹽鐵簿書不與署置院官更相是非莫有用者滂  
乃奏宏與臣相戾臣掌國家大計倘職不修無所逃罪今巡院

多闕官何以輯事有詔遵大曆故事如劉晏韓滉分掌宏在職  
勤恪官署晨入夕歸下吏雖勞未嘗厭苦清白勤幹見稱於時  
卒年七十三廢朝贈右僕射諡曰敬滂至揚州按徐粲速僕妾  
子姪得贓鉅萬徙于嶺表

王紹本名純字德素避憲宗諱改白太原徙京兆萬年父端第  
進士有名天寶間與柳芳陸據殷寅友善據嘗言端之莊芳之  
辯寅之介可以名世終工部員外郎紹少爲顏真卿所器奏爲  
武康尉再佐蕭復府爲包估租庸鹽鐵判官遣貢縑帛五十萬  
會李希烈阻兵江淮道梗聞由穎入汴聞德宗已西狩紹督輕  
貨趣金商道走洋州涕泣見帝方乏春服軍士皆喜遷倉部員  
外郎時兵旱頻連有詔戶部收闕官俸稅茶及無名錢以修荒  
政卽令判務歷戶兵二部郎中事皆專領久之進戶部侍郎判

度支又拜尚書上以其謹密眷待殊異主計八年政事多所關  
訪未嘗漏洩亦不矜銜順宗立王叔文奪其權轉兵部尚書俄  
檢校吏部出爲東都留守元和初加檢校右僕射武寧軍節度  
使復隸濠泗二州至鎮蒐輯軍政推誠示人自張愔後兵驕難  
治裨將安進達唐重靖謀亂以計取之出家貲賞士舉軍安賴  
復拜兵部尚書判戶部卒年七十二贈右僕射諡曰敬  
李巽字令叔趙州贊皇人少苦心爲學以明經調華州叅軍拔  
萃登科授鄆縣尉周歷臺省至左司郎中不爲竇叅所悅出爲  
常州刺史叅貶召爲給事中歷湖南江西觀察使銳於爲理加  
檢校散騎常侍兼御史大夫持下以法動必察之吏不敢欺順  
宗初入爲兵部侍郎杜佑稱其幹治奏爲度支鹽鐵轉運副使  
俄代領使自劉晏後舉職頗艱賦入廢耗巽掌使一年征課所

入類晏之多明年過之又明年加一百八十萬貫更歷三年所  
運江淮米五十萬斛抵河陰皆盈其數歷兵吏二部尚書使在  
如故天性精於吏職雖在私家案牘勾檢如公署人吏有過絲  
毫無所貸雖在外常恐慄如在巽前程巽坐叔文黨廢特薦引  
之賴巽吏才明辨勾檢簿籍又精於巽故巽之課最巽所助也  
會有疾郎官相率省問不言其他但與考校程課商略功利卒  
年七十一贈左僕射爲人強狠忌刻有所憎恨輒殺之叅後貶  
郴州卽所屬郡具奏受劉士寧賂與藩鎮交通激怒德宗賜死  
議者寃之

范傳正字西老鄧州順陽人父倫戶部員外郎與李華交善有  
文名傳正微時客遊西陲長舉進士宏辭書判皆高第授集賢  
殿校書郎除渭南尉拜監察御史殿中侍御史比部員外郎出

為歙湖蘇三州刺史皆有殊政進宣歙觀察使代還坐治第違制憲宗薄之不用改光祿卿以風痺卒贈左散騎常侍為人奸古性精悍初自整飭及宦益達用度遂奢領貲以貨權貴私公府如家帑幸素有名不至甚敗有所著西陲要略三卷戴叔倫字幼公金壇人師事蕭穎士及門為冠劉晏表主運湖南至雲安楊惠琳反馳客劫之令歸金幣緩死說以朝廷責任身可殺財不可奪賊憐而捨之復表曹王臯湖南江西幕府討李希烈留領府事俄為撫州刺史民爭溉灌為作均水法俗便利之耕餉歲廣獄無繫囚暮年詔書褒美封譙縣男加金紫服勸執政齊映劉滋屯難未靖金穀之司不可輕易天下州縣有上中下紫望雄輔者有司銓擬皆便所私此非為官擇人為人求治之道其尤切者縣令錄事參軍宜出中書門下無計資序

遠近高卑一以殿最升降其人知勸戒等重其言遷容管經略使綏徠部落威名流聞其治清明仁恕復多方略故所至稱最德宗嘗賦中和節詩遣使者寵錫代還卒于道年五十八杜兼字處弘宰相正倫繼子志靜之後父廙為鄭州錄事參軍死祿山亂時兼尚幼逃入終南山與伯存介俱為賊執臨刑號泣願為奴以贖遂皆免建中初兼登高第辟徐泗張建封府積勞為濠州刺史探知德宗意厭兵重代易刺史乃謀自固修武備募占勁兵三千帝以為才素性浮險嘗橫恣僚官時進士韋賞象先孫陸楚皆名家子在幕有美譽論事忤兼誣劾以罪詔執賞等杖殺之眾莫不冤又妄繫令狐運陷李藩不克所至人咸側目元和初入為刑部郎中改蘇州刺史比行上書言李錡必反留為吏部郎中遷給事中尋擢河南尹素與杜佑善終始

倚爲助力所至大殺戮尚豪侈哀藝貲財極所嗜欲適幸其時未喜敗酷好聚書至萬卷卒年七十從弟羔貞元初進士有至性父死河北母更兵亂不知所之羔憂號終日後除澤潞判官鞫獄有媪辨對不凡問之乃羔母因得奉養後卒不知父墓處晝夜哀慟一日舍佛祠觀柱間有文字乃其父臨死記墓所在羔奔往會有耆老識其壠因是得葬元和中爲萬年令時京尹元義方苛細與長安令許季同皆坐租賦不時免官復以辨列有詞奪尹俸議者以羔爲直未幾授戶部郎中後歷振武節度使以工部尚書致仕卒贈右僕射諡曰敬

李景略幽州良鄉人祖楷固本契丹李盡忠驍將武后時與駱務整來降授左玉鈐衛將軍封燕國公務整右武威衛將軍父承悅檀州刺史密雲軍使景略蔭補幽州功曹大曆末寓居河

中闔門讀書李懷光辟署朔方巡官五原有偏將張光家富于財挾私殺妻貨吏不能斷景略訊其實竟論以法因授大理司直遷監察御史嘗勸懷光殺朱泚還詣行在不聽景略出軍門慟哭曰誰知此軍一旦陷於不義軍士相顧駭嘆甚義之遂遁歸尋辟靈武杜希全幕府轉殿中侍御史權豐州刺史豐當回紇孔道前守多懦弱遇使至輒與抗禮適遣梅錄將軍隨中官薛盈珍入朝景略欲折之托以郊迎密與盈珍言可汗新沒欲申弔禮梅錄未喻卽俯僂前哭驕容傲色索然以解遂以父行呼之自此使至皆拜于庭威名顯聞希全懷忌誣奏貶袁州司馬死後徵爲左羽林將軍召見延英奏對侃侃有大臣風彩適河東李說有疾詔拜太原少尹兼行軍司馬梅錄復遣入朝方爭位次說不能過景略叱之梅錄識其聲音疾往前趨拜遂居



次坐歲餘傳言回紇將南下陰山豐州宜得其人乃拜爲刺史兼御史大夫天德軍西受降城都防禦使至則節用約已與士卒同甘苦號令嚴肅智略精明鑿成應永清二渠溉田數百頃公私利焉二歲後廩儲器械畢具軍聲雄冠北邊回紇畏之俄卒於鎮年五十五贈工部尚書

任迪簡京兆萬年人登進士擢累殿中侍御史天德李景略表爲節度判官天性重厚景略用法嚴偶因宴客行酒者誤進醢不忍其死盡醢之徐以他辭請易軍中悅其長者無何景略卒舉軍推以爲帥監軍使不聽拘之別室衆大呼破戶出之德宗遣使者察變具得所以然乃授豐州刺史天德軍使兼御史大夫就加散騎常侍入爲太常少卿太子左庶子張茂昭舉易定歸擢行軍司馬大將楊伯玉據城叛不納衆殺之別將張佐元

復叛又斬以徇始得入加檢校工部尚書充節度使承茂昭奢縱後公私屈乏至欲饗士無以給自奉糲糲士卒同甘苦在鎮三年上下完充有疾入除工部侍郎不能朝改太子賓客卒贈刑部尚書諡曰襄

樊澤字安時河中人父詠開元中舉草澤試大理評事澤生長河朔相衛節度薛嵩奏爲磁州司倉擢堯山縣令建中元年舉賢良對策禮部侍郎于邵厚遇之復善楊炎薦爲左補闕歷都官員外郎尋充入蕃使徙鳳翔張鎰與吐蕃尚結贊會盟於清水遷金部郎中兼御史中丞山南節度行軍司馬俄代賈耽爲襄州刺史兼御史大夫山南東道節度觀察等使頻與李希烈兇黨接戰前後擒降驍將張嘉瑜杜文朝梁俊之李克誠薛翼等收唐隨二州母憂起復右衛大將軍復代張伯儀尹江陵三

歲加檢校禮部尚書又代曹王臯凡兩領山南東道威惠著於襄漢加檢校右僕射卒年五十贈司空諡曰成生平好讀兵書兼善武藝綽有將相材器嘗名對延英德宗嘉其論兵多與已合出與諸將射獵常貫其右人心服之賊衆畏焉

崔漢衡博平人爲人沈懿博厚善與人交始爲費令表令狐彰鄭滑掌書記遷殿中侍御史大曆六年檢校禮部員外郎爲和蕃副使還遷右司郎中建中二年吐蕃大相尚結贊請盟擢殿中少監兼御史大夫充正使偕蕃使區頰贊俱還約盟改鴻臚卿與宰相李忠臣盧杞關播崔寧尚書喬林御史大夫于頔太府卿張獻恭司農卿段秀實少府監李昌夔京兆尹王翊金吾大將軍渾瑊同盟京城之右郊帝以疆場不定復令漢衡持節送歸決於贊普乃定盟清水後藉其力吐蕃以兵佐瑊收朱泚

武功轉秘書監俄拜上都留守淄青魏博賑給宣慰使又使陝州還奏稱旨已而賞吐蕃薄復叛盟貞元三年同會盟使渾瑊復盟平涼被執將殺之以善蕃語知其善尚結贊又得從史呂溫以身翊捍得脫蕃亦素信其誠仍加溫撫厚給養之至河州得還明年出爲晉慈隰觀察使卒贈尚書左僕射

韋臯字城武京兆萬年人六代祖範有功周隋間臯起家建陵挽郎調華州叅軍累辟帥府擢監察御史署張鎰鳳翔營田判官轉殿中侍御史知隴州行營留事楊炎使朱泚援東川留范陽兵五百統以故將牛雲光泚叛雲光謀請臯爲帥劫以臣泚別將翟晔伺知白臯爲備雲光知事洩率衆奔泚至汧陽遇僕隸蘇玉還語太尉已登寶位使授臯御史中丞君可引還雲光從之臯迎勞僞受泚詔給曰大使苟不懷詐請釋甲以安衆雲

光易臯書生命士委鎧仗臯受而內之明日置酒大會伏兵殺  
玉與雲光泚又使劉海廣授臯鳳翔節度使臯亦斬以徇遣其  
兄平間走奉天上功德宗建隴州爲奉義軍拜臯節度使擢平  
萬年尉以寵其功臯築壇血牲與士爲盟期必誅泚又馳使與  
吐蕃連和隴坻獲安車駕還京名爲左金吾衛將軍遷大將軍  
貞元初代張延賞鎮劍南西川拜檢校戶部尚書初雲南蠻羈  
附吐蕃往往導令入寇臯至遣使招徠欲以斷蕃右臂會蠻酋  
苴笏時兄子烏星幼攝領部事及是還政烏星臯請皆封爲王  
俾禮讓行于殊俗以化拂戾詔以爲順政王自此欵邊內附約  
東蠻鬼主驃傍苴夢衝皆叛吐蕃斷瀘水橋來請濟師臯遣精  
卒二千與蠻共破吐蕃於臺登殺青海大酋乞臧遮遮具酋尚  
結贊子勇悍久爲邊患旣亡諸酋喪膽他如臘城酋悉多傷

及論東柴等以次降定進檢校吏部尚書初東蠻地二千餘里  
兵常數萬南倚閭羅鳳西結吐蕃狙勢彊弱爲害至是綏服之  
每戰有功詔封驃傍和義王夢衝懷化王賜以兩林勿鄧等印  
久之夢衝復叛遣將蘇危斬于琵琶川立次鬼主樣棄等蠻部  
震服乃建安彝軍於資州控制諸蠻城龍谿於西山保納降羌  
九年詔城鹽州命大將董勳張芬分出西山靈關以牽繫之遂  
破吐蕃論莽熱援兵進圍維州有功封扶風縣伯於是西山女  
國訶陵南水白狗逋租弱水清遠咄霸八國酋長皆請入朝乃  
遣幕府崔佐時由石門趣雲南降南詔異牟尋石門者隋史萬  
歲南征道也天寶中鮮于仲通下兵南溪道遂閉臯復治之由  
黎州出邛部置青溪關號曰南道詔加統押近界諸蠻西山入  
國雲南安撫使俄進同中書門下平章事十三年復駕州吐蕃

怨完壘造舟謀擾邊陲輒破卻之自是曩貢臘城等九節度嬰  
嬰籠官馬定德與大將八十七人舉部落皆降定德有計略習  
知兵法及山川地形吐蕃每用兵常乘驛計事諸將稟其成算  
懼而歸心十七年吐蕃昆明管些蠻又內附贊普怒北掠靈朔  
破麟州以求報復臯出兵五萬遣鎮靜軍使陳洎由三奇威戎  
軍使崔堯臣趨石門兵馬使仇冕董振走維州邢玘出黃崖都  
將高侗王英俊趨故松州兵馬使元膺出黎靑州鎮南軍使韋  
良金趨平彝經略使路惟明攻逋租城王有道涉大度河陳孝  
陽道西瀘攻昆明諾濟二城咸以八月行至十月破拔堡砦轉  
戰千里吐蕃釋靈朔兵使論莽熱來救生擒以獻帝大悅進檢  
校司徒兼中書令封南康郡王御製紀功碑褒賜之順宗立加  
檢校太尉遣劉闢謁王叔文請盡領劔南叔文怒欲斬闢會遁

去自以帷幄大臣可預國大議卽上表請皇太子監國又上牋  
太子勸進暴叔文佞等之姦憲宗遂受禪是歲臯暴薨年六十  
一廢朝五日贈太師諡忠武臯治蜀二十一年重賦斂以事月  
進時論譏之凡破吐蕃衆四十八萬禽殺節度都督城主籠官  
千五百斬首五萬餘級獲牛羊二十五萬收器械六百三十萬  
其功烈爲西南最善撫士卒至婚嫁死喪皆厚資之自以侈橫  
不欲洩於朝僚掾官秩雖顯不使還闕惟署屬州刺史劉闢踵  
其故態厲階始此有陸暢者字達夫雅所禮愛反李白作蜀道  
易以美晚節務私其民互除州租凡三歲一復沒後蜀人德之  
見其遺像必拜凡刻石皆鑿其名以示尊諱一兄聿以陰調南  
陵尉遷秘書郎辟淮南杜佑府元和初爲國子司業終太子右  
庶子平早卒子正貫字公理初蔭爲單父尉舉賢良異等除

弘簡錄 卷四十二  
枝書郎調華原尉又中詳閑吏治科遷萬年簿累司農卿進壽  
州團練使宣宗立以治最拜京兆尹出爲同州刺史俄擢嶺南  
節度使至官清介拆毀淫祠教民毋妄祈居三歲以疾卒年六  
十八贈工部尚書 闢字太初擢進士宏詞二科遷累御史中  
丞充度支副使臯卒令主後務意帝可動益築鰲吐不臣語求  
兼統三川與同幕盧文若善欲授以東川惑術家言五福太一  
舍于蜀乃造大樓以祈祥杜黃裳言其書生狂妄可鼓而擒詔  
仍許自新闢不聽始下詔奪其官高崇文下成都文若先殺其  
族縋石自沉于江矢其屍闢從數十騎走至羊灌田投水不死  
爲騎將酈定進所擒檻送京師詔詰反狀對臣不敢反乃五院  
子弟爲惡不能制又問遣使賜節何不受始伏罪獻于廟社及  
徇都市斬城西南獨柳下子超郎等九人與部將崔縉以次誅

林蘊字復夢莆川人家世通經父披字茂彥署臨汀合縣多山  
鬼淫祠撰無鬼論以治行終府別駕蘊辟西川節度推官嫉臯  
專制感憤關說闢反曉以逆順不聽復遺書切諫怒械于獄臨  
刑闢陰戒其下抽刃磨其頸將以脅服之蘊叱曰死卽死我頸  
豈奴砥石耶闢知不可屈置不殺降爲唐昌尉敗後名重京師  
然嗜酒多忤物故不大用除滄景程權掌書記貽書宰相言國  
家有西土猶體之有右臂今臂不附體未數百里便爲外域涇  
原鳳翔邠寧三鎮擁旄數十百人唯李抱玉請復河湟命將  
復不得人宜拔行伍之長使守秦隴王者功成作樂治定制禮  
豈有權臣擅制樂曲自立喪紀舜命契爲司徒今乃用強臣爲  
之盧從史于臯暮罪大雨刑輕農桑無百分之一竭力於下者  
饑不得食寒不得衣邊兵菜色將帥縱侈中人十戶不足以給

一無功之卒。百卒不足奉一驕將。言皆切當世。既而權上州版  
軍中習安擅地。畏內屬挾權。拒命不得出。蘊陳君臣大誼。諭首  
將權始得去。遷禮部員外郎。劉伯芻薦授郃州刺史。卒。  
郗士美字和夫。兗州金鄉人。父純字高卿。舉進士。拔萃制科。皆  
高第。張九齡李邕數稱之。登朝。由拾遺補闕。員外郎。中諫議大  
夫。中書舍人。歷職不回。爲元載所忌。魚朝恩署牙將。李琮兩街  
功德使。恃勢榮橫。推辱京尹。純請速處其罪。載不納。辭疾還東  
都。十年不出。號伊川田父。德宗立。崔祐甫執政。召爲太子右庶  
子。集賢學士。不拜。改詹事。致仕。帝召見。褒嘆。賜金紫。公卿咸祖  
都門。世高其節。有文集六十卷。士美少通五經。史記漢書皆能  
成誦。與父友蕭穎士顏真卿柳芳相論。繹爲忘年交。未冠擢陽  
翟丞。以才佐李抱真潞州幕府。歷王虔休李元皆留。不徙。久乃

進房州刺史。兼御史大夫。持節黔中。經略觀察等使。討平溪州  
賊。向子琪諂書勞慰。加右散騎常侍。封高平郡公。遷京兆尹。每  
別殿延問。必咨訪大政。出爲鄂岳觀察使。遇伊慎入朝。其子宥  
利主軍。懼母喪不赴。士美托從事告之。卽爲辦裝。宥不敢辭。元  
和五年。改河南尹。明年拜檢校工部尚書。充昭義節度使。出廩  
錢市物。自給。悉罷。抱真以來私厨。月省米六千石。羊酒稱是。潞  
人德之。又罷盧從史。以私恩日餉牙兵三百人。膳討王承宗。遣  
大將王獻督萬人爲前鋒。責以恣橫。還撓斬之。親鼓而前。大破  
賊兵。時諸鎮多玩寇犯法。獨士美治軍完整。威震兩河。最先有  
功。承宗大懼。憲宗喜曰。固知士美能辦吾事。俄以疾召還。歷工  
刑二部尚書。忠武軍節度使。卒。年六十四。贈左僕射。諡曰景生  
平。與人交務重。然諾以是名重於世。

嚴綬挺之從孫曾祖方約利州司功叅軍祖挹之符離尉父丹  
殿中侍御史綬登大曆進士累佐使府本名家子爲吏有方略  
貞元中宣歙團練劉贊表爲副使加侍御史政事多所咨委贊  
卒傾府藏進獻由是有寵名爲刑部員外郎贊佐進獻自綬始  
也未幾轉司封郎中充河東行軍司馬閱歲進銀青光祿大夫  
檢校工部尚書兼太原尹北都留守元和初討楊惠琳劉闢悉  
選精兵委牙將李光顏蜀夏平加檢校左僕射尋拜司空封扶  
風郡公在鎮以寬惠爲治軍政補署一出監軍李輔光綬惟拱  
手而已居凡九年士馬蕃息境內稱治四年入拜右僕射銳於  
勢利不惜名節嘗拜中使馬江潮爲御史所劾出鎮荆南進封  
鄭國公招降潞州蠻首張伯靖討吳元濟加招撫使到軍日遽  
發公帑賞士并厚略中貴人以招聲譽其實無尺寸功裴度屢

言勇將帥之才不可責以戎事乃拜太子少保代歸久之進位  
大將軍至三十一戶卒年七十七贈太保爲人材器不踰常品  
事兄嫂過謹爲時所稱統臨三鎮皆號雄藩所辟士親賂爲將  
相者凡九人

辛秘隴西人少嗜學於禮家尤洽貞元中擢明經授華源縣簿  
判復入等調長安尉太常高郢奏爲博士累兵部員外郎署山  
陵郊丘禮儀判官憲宗初拜湖州刺史李錡反易其儒者秘名  
牙將丘知乙夜開城收壯士數百逆戰大破之斬其將進焚營  
堡以功賜金紫名爲河東范希朝行軍司馬討王承宗使主留  
務歷左司郎中諫議大夫汝常二州刺史河南尹蒞職修政皆  
有可稱進檢校工部尚書昭義軍節度兼御史大夫時承恆趙  
討伐潞人彫耗秘至約出入嗇用度比四年儲錢積糧器械堅

良復爲完鎮名還病卒年六十四贈左僕射諡曰肅後更諡懿  
生平居不易第服不改初奉祿悉與親表故舊自銘其墓預定  
送終制儉而不違於禮

崔弘禮字從周系出博陵北齊僕射懷遠之裔祖育常州江陰  
令父孚湖州長城令弘禮自少倜儻以意氣自任及長風貌魁  
偉磊落有大志通涉兵書留心軍旅之要常從宣武劉玄佐獵  
夷門臂鷹馳逐緩急在手一軍皆驚至京師所善李觀病死殫  
楮爲治喪葬累更選用登進士書判異等官累侍御史以親老  
不應靈武李樂之辟元和中爲東都呂元膺留守叅謀爲之籌  
畫籍揣賊情部分兵衆以固東都李師道謀襲洛卒以無患奏  
爲留守判官擢汾隸二州刺史田弘正入覲表刺衛州充魏博  
節度副使弘正伐李師道兵機多所咨逮還鎮復移相州長慶

元年加檢校左散騎常侍令副張弘靖鎮盧龍未及境幽鎮兵  
亂復改絳州踰年汴州李齊反急追爲河南尹兼御史大夫東  
都汝穎防禦副使齊平遷河陽節度使數歲整練戈矛頗壯戎  
備又請闢秦渠下荒田二百頃歲收粟二萬斛詔皆從之以疾  
連表請代拜檢校戶部尚書華州刺史復代烏重胤鎮天平軍  
與李聽合兵討李同捷至濮州大將李萬瑀劉宗擁兵自固奪  
之破賊禹城獲鎧裝數十萬表萬瑀守沂州宗守黃州又自充  
開盲山故渠自黃隊抵青丘師乃大濟又斬李祐鄭滑潰兵三  
千更出鄆兵三千助祐遂大破賊藉屍十餘里祐望鄆拜曰活  
我者崔公也凡理鄆三載文宗卽位就加檢校左僕射改東都  
留守遷刑部尚書卒年六十四贈司空生平寡閑民務居鮮愛  
利歷踐藩鎮無可尚之績晚節更勤蓄積物議疵之



王遂宰相方慶元孫賦性強幹以吏能聞於時尤長於興利銳於操下法頗嚴酷累遷至鄧州刺史以曉達錢穀入爲太府卿與度支潘孟陽有私憾時議營田互相爭論言其非便憲宗怒出遂爲柳州刺史制有清能業官之語左丞呂元膺執奏遂親吏韋行素柳季常犯賊法當從坐不宜有清字柳州大郡出守爲優以制書封還上喻之方行尋爲宣歙觀察使宿兵淮西財賦正急藉以辦集事平召拜光祿卿復討李師道改檢校左散騎常侍兼御史大夫充淄青行營諸軍糧料使初計兵食三百萬賊誅簿羨貲一百萬以獻上以爲能會分師道所管州爲三鎮卽以爲沂州刺史充海等州觀察使瘠於聚斂治尚褊尅不存撫諭大體所製笞杖率踰常制民吏久染汙俗率多獷戾詈爲反鹵牙將王弁乘人心忿怒瞰方宴會譟集其徒殘遂於殿

判官張敦實官屬李矩甫等同遇害弁自知留事帝思反側方平拜弁開州刺史至徐州械送京斬之

王式起次子初廢爲太子正字復中制科授監察御史遷殿中侍御史中丞歸融劾其交結鄭注王守澄出爲江陵少尹大中朝拜晉州刺史會河曲大歉勞卹流民活者數千申嚴警備饑寇特峨不敢道境種落避去以善最稱徙安南都護浚壕繚柵外植刺竹蠻不敢冒遇入掠錦田步使譯者往問答以自縛叛獠非爲寇也交趾咸憚其威不自安托以黃頭軍渡海來襲中夜率兵圍城合謀請都護北歸式被甲乘城責讓矢檣交發衆走翊日盡捕斬之容管以災歉久不歲貢式至始輸而占城真臘自是慕義悉入貢獻代還又令討劇賊仇甫懿宗名問方略奏請益兵議者因餽多惜費式奏盜若猖狂天誅不亟東南征

賦寧可保乎兵多則功速斯二者孰利帝顧左右宜與兵乃益以許滑淮南將發之日麾幟皆束靡獵獵有聲喜曰得天時矣聞賊用騎兵閱所部得吐蕃回鶻遷隸數百又發龍陂監牧馬集土團諸兒爲向導果捕斬之加檢校右散騎常侍奏餘姚豪民徐澤專魚鹽之利慈谿民陳斌冒名仕至縣令此誠巨猾窮治其奸皆榜死之徐州銀刀軍亂徙武寧節度使檢校工部尚書詔許滑兵自隨視事三日悉以計誅會詔降武寧爲團練罷歸終左金吾大將軍

薛元賞并弟元規素與李德裕善太和初爲司農少卿長於吏事能推言時弊維州之議上書極論可因撫之潰鹵膺腹牛僧孺惡之出爲漢州刺史段文昌上其治狀遷司農卿久之拜武寧軍節度使罷泗口猥稅人以爲便轉鎮邠寧會昌中德裕當

國拜京兆尹禁屯戍勢擾府縣杖惡少剽效坊閭戢軍折暴百姓賴安歷吏工二部領諸道鹽鐵轉運使元規復爲京兆少尹知府事德裕罷坐貶崖州元賞下除袁王傳久之復拜昭義節度使卒

李福字能之宰相石之弟太和中登進士辟楊嗣復劍南幕府崔郾引爲集賢校理調藍田尉石自薦才堪理人授監察御史累遷戶部郎中歷商鄭汝穎四州刺史進諫議大夫大中時党項震擾授夏綬銀節度使有善政徙鎮鄭滑遷兵部侍郎判度支再鎮宣武入遷戶部尚書持節宣撫蜀蠻卽拜劍南西川節度使同中書門下平章事與蠻戰敗績貶斬王傳分司東都僖宗初就加留守檢校左僕射移節山南東道團訓鄉兵據險以禦王仙芝賊不敢入轉略岳鄂逼于江陵節度使楊知溫求援

自將州兵及沙陀騎五百赴之賊已殘江陵郭聞福至乃走以勞加檢校司空還朝終太子太傅

劉潼字子固宰相晏從孫祖暹性方直歷典數州剛腸疾惡爲觀察使所敬建中末由汾州刺史名爲御史大夫盧杞憚其嚴恐必沮已所爲更薦于頔代之後終潮州刺史潼登進士杜棕表爲度支巡官遷祠部郎中大中初討党項羌命爲供軍使復河湟又判度支供軍案歷京兆少尹遣往宣諭山南劇賊挺身直叩其壘稱詔赦罪盜皆列拜約就館降還陳邊事擢右諫議大夫出爲朔方靈武節度使坐累貶鄭州刺史改湖南觀察使名爲左散騎常侍歷昭義河東西川三鎮節度時李福討南詔不利潼至西川懷以恩信蠻皆如約惟六姓持兩端爲南詔間候有甲籠部落者請討之潼因出兵襲擊俘五千人南詔大懼

自是不敢犯邊以功加檢校右僕射卒贈司空

崔安潛字進之宰相慎由弟登大中進士累歷清顯咸通中歷江南觀察忠武軍節度使王仙芝寇河南募人增陴繕械首請會兵討捕號令精明賊畏之不敢犯使大將張自勉將兵援宋州賊圍宋急官軍數却自勉收南月城斬賊二千級仙芝解去宋威忌自勉欲使蒞麾下又乞併安潛軍宰相鄭畋奏威有疑忿必殺自勉是反以功受戮安潛方抗賊有功若悉取銳兵後有緩急將何以戰又爲有勞不賞無以示天下詔止以陳許兵四千付威餘還自勉乾符中代高駢領西川節度吏凡倚駢爲姦利者皆誅之數更除繆政在任盜賊衰止蜀民又安宰相盧攜右駢誣以罪罷爲賓客分司黃巢亂僖宗幸蜀召爲太子少師王鐸奏授諸道行營副都統收復兩京以功累加至檢校侍

中鐸罷兵復爲少師留守東都龍紀初拜平盧節度使檢校太師兼侍中代王敬武會其子師範自立不得入而還於太子太傅卒贈太子太師諡貞孝在職長於吏事雖干戈倥傯未嘗不身聽具獄子二柅景福中爲起居郎至尚書臚爲右拾遺從子彥會咸通初由太僕卿爲徐州觀察使長于撫民曉律令然性卞急爲政剛猛徐軍素驕多怨者屬遣士戍桂林舊例三年一更親吏尹戡徐行儉貪不恤士至期請代議加廩賜復留一年戍者怒不俟命擅還殺判官龐勛爲亂彥會命牙將田厚簡往泗州慰勞而用都虞候元密伏甲任山館擊勛勛遣吏給言士思歸不敢過請至府解甲自歸彥會斬其吏勛陷宿州發廩錢募亡命者掠船與騎夾岸譟而進彥會料丁男乘賊悉誅賊家屬俄而勛傳城四面迫墉以入囚彥會大彭館殺之自監軍

使逮官屬焦瑘溫廷皓李悅崔蘊柳泰盧崇嗣韋延範皆死懿宗贈刑部尚書乾符中錄其子祐之爲滎陽尉餘各贈官錄蔭有差

王凝字成庶翊曾孫少孤依舅宰相鄭肅登明經進士二科累辟使府踐履臺省嘗著京城六岡銘文士稱之至中書舍人禮部侍郎以不阿權倖出爲商州刺史驛當孔道吏多破產凝至乃出治賦羨銀以市馬人免橫擾徙湖南觀察使僖宗召爲兵部侍郎領鹽鐵轉運使坐舉非人謫秘書監分司東都就拜河南尹乾符四年江南盜起遷宣歙池觀察使益務儲畜完城繕器以備賊王仙芝黨屠至德遣牙將孟琢助守賊益兵欲襲南陵凝遣樊儔以舟師扼青陽違令斬之諸將皆股慄以死綴賊始不能進時環境皆盜區凝以彊弩拒采石張疑幟遣別將馬

穎解和州圍明年又大至都將王涓自永陽赴敵語以賊席勝而驕可持重待之涓意銳日趨四舍至南陵未食卽陣死焉監軍收餘卒還城恣橫不能禁趣親吏入民舍奪馬凝望見捕取斬之始不敢留會有大星墜寢庭術者令稱疾避之凝曰寧爲大府東南國用所出吾規脫禍一方何賴旣而賊去遂卒年五十八贈吏部尚書諡曰貞無子以從子鑣爲嗣

弘簡錄卷四十二終

弘簡錄卷四十三

明刑部員外郎仁和邵經邦弘齋學

皇清翰林院侍講學士四世孫遠平校閱

庶官 唐六之四 武職

丘行恭 薛萬均 弟萬徹萬淑 盛彥師 盧祖尚

劉世讓 劉蘭 李君羨 龐玉 馮立

謝叔方 李謹行 父突地稽 論弓仁 孫惟貞 郭虔瓘 張孝嵩

郭知運 子英傑英父 王君奐 張守珪 從子獻恭獻甫從孫煦

王忠嗣 及海賓 哥舒翰 子曜 王思禮 高仙芝

封常清 衛伯玉 尉遲勝 尚可孤 來瑱

魯炆 曲環 王栖曜 子茂 斐玢

丘行恭和之子兄弟十五人皆善騎射勇敢絕倫大業末行恭

與兄師利聚衆雍岐間以保郿城羣盜不敢窺人多依之後原  
州奴賊數萬圍扶風太守竇璉堅守賊食盡無所掠散歸行恭  
說賊共迎義師而自率五百人負糧持牛酒詣賊營奴賊長揖  
行拱手斬之謂衆曰若皆豪傑也何爲事奴衆皆伏地曰願改  
事公因率其衆與師利迎謁秦王於渭北拜光祿大夫累從戰  
伐功多遷左一府驃騎錫勞甚厚從討王世充戰却山王欲嘗  
賊虛實與數十騎衝出陣後限于長隄諸騎散走行恭獨從賊  
騎追及流矢著王馬亟回射之發無虛鏃賊不敢前遂下拔箭  
以已馬進王步執長刀斬數人大呼突陣而還隱太子誅以功  
擢左衛將軍所守嚴烈僚吏畏之數坐事免太宗思其功不踰  
時輒復官後從侯君集平高昌封天水郡公進右武侯將軍高  
宗立遷大將軍冀陝二州刺史致仕卒年八十贈荊州刺史諡

曰襄陪葬昭陵詔斲石爲人馬象拔箭狀以旌其功孫神勳  
薛萬均與弟萬徹本燉煌人徙咸陽父世雄大業末爲涿郡太  
守兄弟因客幽州俱以材武爲羅藝所厚與藝歸欵高祖授萬  
均上柱國永安郡公萬徹車騎將軍武安縣公竇建德帥衆十  
萬寇范陽藝迎拒之萬均曰衆寡不敵宜以計勝教藝羸兵阻  
水誘敵而自引精騎匿城左伺建德師半渡擊之大敗其衆明  
年建德以二十萬騎來攻兵已緣堞兄弟率死士從地道出掩  
擊其背衆驚潰去秦王平劉黑闥引萬均爲右二護軍貞觀初  
遷殿中少監副柴紹討梁師都萬徹亦從距胡方數十里突厥  
兵驟至王師却兄弟奮出擊之斬其驍將突厥走遂圍師都諸  
將謂城險未可下萬均曰城中氣死鼓不能聲破亡兆也旣而  
果斬師都降其城拜左屯衛將軍俄爲沃沮道行軍副總管從

李靖討吐谷渾軍次青海各率百騎前行卒與敵遇萬均單騎馳突無敢當者還語諸將曰賊易與耳復馳進斬數千級勇益三軍追奔至積石山大風折旗遽命勒兵曰敵且至俄而果至萬均直前斬其將衆遂潰追至圖倫磧乃還與靖會青海璽書勉勞遷本衛大將軍又副侯君集擊高昌智盛降進潞國公坐帝幸芙蓉園清宮不謹下獄憂憤卒帝驚悼舉哀命陪葬昭陵萬淑亦有戰功貞觀初歷右領軍將軍營州都督檢校東夷校尉封梁郡公暢武道行軍總管萬備有至行居母喪廬墓璽書卹慰表異其門爲尚輦奉御從李勣伐高麗圍白巖城敵兵來援契苾何力苦戰中槩萬備單馬救之何力獲免任至左衛將軍

盛彥師宋州虞城人少任俠大業末爲澄城長義師至汾陰率

賓客上謁授行軍總管從平京師俄與史萬寶鎮宜陽李密叛引思歸上并驍賊王伯當謀出山南鋒銳不可當萬寶懼彥師笑曰請兵數千當爲公梟其首時密聲言入洛其實走襄城就張善相彥師卽引衆踰洛水據其要路命士入熊耳山夾道持滿短兵陰伏溪谷伺賊半渡橫擊之密果至首尾不相救遂斬密與伯當以功封葛國公拜武衛將軍鎮熊州討王世充復與萬寶軍伊闕絕山南路事平擢宋州總管刺史陳寶不以禮待其家因事殺之及平生所惡數十家鄉人震駭徐圓朗反詔爲安撫大使戰敗被執圓朗待之厚命書招其弟使舉虞城降書反罪已奉使無狀被擒若宜善待老母誓死報國慎勿念我圓朗以爲壯士待之如舊後平得還以罪誅死

盧祖尚字季良光州樂安人父禧隋虎賁郎將累葉豪富輕財

好施以仗聞祖尚年十九武力過人大業末募壯士捕盜善于御衆所向有功盜畏之不敢入境宇文化及之亂據州自稱刺史歃血誓衆士皆感泣越王侗立遣使歸地因署本州總管封沈國公王世充篡舉州歸唐賜以璽書拜本州刺史封弋陽郡公從趙郡王討輔公祏爲前軍總管下宣歙破賊帥馮惠亮陝正通俄歷壽州都督蔣瀛二州刺史才備文武咸有能名貞觀二年徵至京改爲交州都督名見內殿面諭交州去朝廷遠前都督不稱職卿有安邊之略特茲簡任無以道遠爲辭祖尚頓首奉詔旣而託疾自解帝遣杜如晦等諭旨曰三年當召決不食言匹夫尚不負然諾旣已許朕豈宜中悔祖尚到以瘡痍癘臣不能飲酒當無還理遂固辭帝怒曰朕使大夫不美以天下命斬于朝堂時年二十七

劉世讓字元欽京兆醴泉人仕隋爲武州刺史以事歸授通議大夫請安輯扶風寇唐弼餘黨皆安定道行軍總管以拒薛舉不勝遂與弟寶皆沒舉破卜孫說使降世讓陽許之至則告守者賊兵已盡於此世讓自歸以圖安全舉重其節不加害秦王方屯高墟密遣使通消息歸言賊虛實高祖悅賜其家帛千匹舉平得歸授彭州刺史俄領陝東道行軍總管從永安王討呂崇茂軍敗復在賊因唐儉語以獨孤懷恩逆謀若果得行則國難未息亟令亡歸自發之世讓逃還值高祖方濟河幸懷恩營驚以天使之來卽封爲弘農郡公賜庄田一區錢百萬母喪起爲并州總管寶建德援王世充命率萬騎出黃沙嶺襲洛州會突厥入寇又命以兵屯雁門旣而可汗大軍至乃保武州可汗與高開道苑君瑋合衆來攻城數壞



引簡錄 卷四十三  
輒立柵完拒時鄭元壽在蕃又使來說世讓叱之久乃引去元壽還具道其忠賜良馬金帶未幾授廣州總管帝名問備邊策答曰突厥數南寇恃有馬邑接濟如使勇將屯崞城厚儲金帛以招降者數出奇兵略城下蹂踐禾稼敗其生業不踰歲可圖帝曰非卿無可任者乃使馳驛經略既至高滿政以地降突厥患之縱反間云與可汗爲亂帝不之察誅之并籍其家貞觀初因降者言始白其誣原其妻子

劉蘭字文郁青州北海人性多凶狡仕隋郡陽郡書佐頗涉圖史能言成敗事見天下將亂獨北海完富潛介賊破其鄉取子女玉帛武德中淮安王神通安撫山東蘭率宗黨歸順以功拜尚書員外郎貞觀初梁師都未平上陳方略太宗擢爲夏州都督府司馬師都引突厥兵頓城下輒什旗息鼓賊疑不敢追討

其引去追擊破之遂進軍師都平遷豐州刺史名爲右領軍衛將軍十一年爲夏州都督長史總府事時突厥攜貳郁射設阿史那摸末率部落居河南蘭縱反間離之頡利果疑摸末懼而來降頡利急追蘭逆拒卻其衆太宗嘉其能卽拜都督封平原郡公俄權代州都督以信讖記長社許絢給以劉將軍當爲天下主其子昭又言北海出天子而鄠縣尉游文芝繫獄當死因發其謀遂與其黨皆伏誅

李君羨洛州武安人初事李密後爲王世充驃騎歸高祖授上輕車都尉秦王引置左右從破宋金剛加驃騎將軍賜以宮人繒帛討世充爲馬軍副總管世充子玄應自武牢轉糧入洛君羨襲走之又從破竇建德劉黑闥所向必先登摧其鋒累授左衛府中郎將突厥至渭橋又與尉遲敬德擊破之改左武侯中

郎將封武連縣公北門長上在仗讀書不休帝嘉勞歷蘭州都督左武衛將軍先是貞觀初太白數書見太史占曰女主昌又謠言當有女武王者太宗惡之會內宴爲酒令各言小字君羨自稱五娘子帝愕然笑曰何物女子乃能健耶又忌其官名封邑皆有武字乃出爲華州刺史復與狂人員道信爲妖言御史劾之乃伏誅天授中家屬詣闕訴寃后亦欲自詭詔復官爵以禮改葬

龐玉京兆涇陽人魁梧有力事隋爲監門直閤以關中兵屬王世充擊李密百戰不劬會秦王東徇至洛王率萬騎降高祖以舊臣禮之玉明軍法久宿衛習知朝廷制度帝顧諸將都不閑儀檢授玉領軍武衛二大將軍使衆觀以爲式出爲梁州總管巴山獫狁餘黨四奔屬縣獠爲游說不可窮蹶玉不聽下令

中曰穀熟吾盡收以饋賊非盡吾不反聞者懼謂穀盡且餓乃共入賊營與所親相結斬渠長以降衆遂潰徙越州都督名爲監門大將軍太宗時以耆舊令主東宮兵老而益勤不敢怠小大事無不親卒帝爲廢朝贈幽州都督工部尚書

馮立同州馮翊人少有武藝略涉書記建成引爲翊衛車騎將軍託以心膂會兵敗遁走俄自詣請死太宗數其二罪在東宮構阻骨月昨又殺敬君弘何可逃免對曰出身事主期以効命當戰之日遑知其他因伏地歔歔上復慰勉赦其死立已蒙貸歸語所親上恩莫大死而復生當知所報未幾突厥至便橋命率數百騎與戰於咸陽殺獲甚衆上聞而嘉嘆拜廣州都督前帥多驕貢苛虐蠻貊致怨叛立到不營產利得遠近心凡任數年甚有惠政嘗至貪泉酌以自况曰吾當汲而爲食豈止一

孟耶後卒於官人思之不忘

謝叔方雍州萬年人善治軍戎初從齊王元吉征討有功奏授  
屈陞直府左軍騎率府兵曹與馮立戰北闕下秦府兵幾不振  
尉遲敬德傳元吉首以示叔方下馬號哭而遁明日首罪來歸  
太宗稱爲義士命釋之歷遷西伊二州刺史綏邊有功恩威兼  
至所部愛而敬之如事嚴父貞觀末累加銀青光祿大夫歷洪  
廣二州都督卒諡曰勤

李謹行靺鞨人父突地稽部酋長隋末內附居營州授金紫光  
祿大夫遼西太守武德初奉朝貢以其部爲燕州授總管劉黑  
闥叛上書秦王請節度以戰功封者國公徙部居昌平高開道  
以突厥兵攻幽州突地稽邀擊敗之貞觀初進右衛將軍賜姓  
李氏謹行偉容貌勇蓋軍中累遷營州都督左監門將軍家童

至數千以貲自雄燕人畏之高宗伐高麗命爲積石道經略大  
使與薛仁貴殿而行留妻劉氏守所駐城敵攻之劉環甲勒兵  
以拒敵引去帝嘉之封燕郡夫人論欽陵衆十萬寇湟中候邏  
不知士樵采半散謹行聞寇至卽植旗伐鼓開門以伺欽陵疑  
有伏不敢進上元三年破吐蕃于清海璽書勞勉封燕國公卒  
贈幽州都督陪葬乾陵

論弓仁本吐蕃國相欽陵之子聖曆二年以所統吐渾七千帳  
自歸授左玉鈐衛將軍封酒泉郡公神龍三年爲朔方軍前鋒  
游奕使令引兵出諾真水草心山邏衛張仁愿築三受降城開  
元初突厥九姓亂復引軍度漠踰白檀林收火拔部論多貞種  
落降之蹙蹙思大叛戰赤柳澗弓仁騎纔五百自新堡進爲賊  
所圍度衆不敵椎牛享士越再宿潰圍得出人服其壯凡闔大

小數百戰未嘗敗北賜以寶玉甲第良田等時莫與比遷至左  
驍衛大將軍朔方副大使會病玄宗遣上醫馳視卒年六十六  
追封撥川郡王諡曰忠 孫惟貞名瑀以字行志向恢大開元  
末爲左武衛將軍從幸靈武轉衛尉少卿募兵綏銀閩旬有衆  
數萬從還鳳翔遷光祿卿充前鋒討擊使戰陝州以功進殿中  
監史思明攻李光弼周摯領兵二十萬陣河陽城下惟貞率銳  
卒數千苦戰鑿門而出自旦及午破之表爲開府儀同三司光  
弼討史朝義令守徐州會賊將謝欽讓據陳乃假惟貞潁州刺  
史斬降萬人封蕭國公實封百戶光弼病表以自代擢左領軍  
衛大將軍爲英武軍使卒

郭虔瓘齊州歷城人開元初累遷驍衛將軍兼北庭都護金山  
道副大總管開元二年突厥默啜遣同俄特勒圍北庭虔瓘飭

壘自守同俄單騎逼城遣勇士突斬之以功授冠軍大將軍封  
太原郡公俄轉安西副大都護進潞國公賜實封百戶奏請募  
關中兵萬人擊餘寇以遂前功詔許之仍給公乘所在續食將  
作韋湊上言臣聞漢徙豪族以實關中不聞更募驍勇以空畿  
甸矧今戶口逋耗萬人所過亘六十里州縣安所供億居人若  
何而濟縱有克獲其補幾何儻稽天誅將諉大事不省旣而果  
不見鹵還遷涼州刺史河西節度大使進右威衛大將軍安西  
副都護與安撫招慰使阿史那獻數持異交訴諸朝玄宗遣中  
郎將王惠齋詔書諭解賜帛二千段及他珍器久之病卒 代  
者張孝嵩由進士姿貌雄偉身長七尺慷慨好兵常以邊任自  
許在安西勸農訓士府庫盈饒徙太原尹卒

郭知運字逢時瓜州晉昌人身長七尺頗有膽略後臂虎口壯

勇善射以鬪功補秦州果毅擢累左驍衛中郎將瀚海軍經略使檢校伊州刺史兼伊吾軍使從郭虔瓘殺突厥有功加右武衛將軍封介休縣公吐蕃將全達延乞力徐寇渭源盜牧馬詔薛訥王駿等相犄角擊敗之進冠軍大將軍鄯州都督兼臨洮軍使賜賚萬計開元四年突厥降戶阿悉爛跌思泰率衆叛執單于都護張知運詔以朔方兵追擊至黑山呼延谷敗之鹵棄仗走取知運而還復兼隴右諸軍節度經略大使六年又率兵入討吐蕃掩其無備遂至九曲獲甲馬犛牛數萬計獻俘京師詔分賜文武五品以上及朝集使三品進兼鴻臚卿攝御史中丞加封太原郡公八年率王駿兵討平六州胡康待賓拜左武衛大將軍授一子官賜金帛雜綵在西方久戎彘咸畏憚之九年卒于軍年五十五贈涼州都督諡曰威上元中配饗太公

廟 子英傑字孟武累擢左衛將軍幽州副總管開元二十二年長史薛楚玉遣與裨將吳克勤烏知義羅守忠帥萬騎及奚衆討契丹屯兵榆關契丹酋長可突于拒戰都山下因奚衆貳言軍不利知義守忠引麾下遁去英傑克勤力戰死麾下六千人不肯屈盡爲所殲 英又字元武少有勇略精武藝策名河隴間以功遷諸衛將軍祿山亂拜秦州都督隴右採訪使賊將高嵩擁兵入汧隴伏兵以待僞爲勞饗盡鹵其衆至德二載加兼御史中丞充隴右節度使自還改羽林大將軍掌衛兵史思明謀掠陳蔡詔統淮南兵及叩陝虢又改潼關防禦進御史大夫兼神策軍節度使代宗授檢校戶部尚書元帥雍王進兵洛陽使爲後殿東都平權知留守以功進右僕射封定襄郡王實封三百戶素性乏檢御其麾下與朔方回紇大掠都城及鄭汝

環城十里門無居人日驕蹇為侈汰服用奢靡甲第華侈媚事  
 元載以固其權未幾拜劔南節度使為政苛暴剝糧賜無所  
 畏憚故時立玄宗所居宮為道院地實奇勝有金像侍衛等每  
 尹至瞻禮而後視事及是壞其像繪輒以自居又教女伎乘驢  
 擊毬以資倡樂鈿鞍寶勒無慮數萬未嘗問及民事人皆怨之  
 會襲崔寧不克其眾反戈內攻乃奔簡州普州刺史韓澄斬首  
 送寧并屠其家

王昌奕字威明瓜州常樂人驍勇善騎射初事郭知運為別奏  
 累功至右衛副率功名與知運畧等時議以其雄武並稱王郭  
 卒後代為河西隴右節度使遷右羽林將軍判涼州都督事開  
 元十四年吐蕃悉諾邏寇大斗谷又攻甘州焚市里而去君奕  
 偵知其兵疲力怠率秦州都督張景順乘冰凌青海襲破其家

俘獲萬計以功遷大將軍封昌奕伯凱還拜其父壽為少府  
 監玄宗宴君奕及妻夏氏於廣達樓賜金帛夏亦自有戰功封  
 武威郡夫人其冬吐蕃來報陷瓜州執刺史田元獻及壽殺居  
 人取資糧進攻玉門軍君奕聞父被執登陴西向哭兵不敢出  
 鹵分遣莽布支攻常樂縣令賈師順城守不下賊說師順吾眾  
 且還宜有以贈師順度城中財帛已盡請脫士卒衣襦悉諾邏  
 乃夜徹營去毀瓜州城師順開門收遺械復完守備吐蕃使精  
 騎還襲見有備乃去初涼州有回紇契苾思結渾四部酋長君  
 奕徵時數為所輕及是誣奏咸有叛謀皆獲罪驅竄司馬護輪  
 等不平思有以復會吐蕃間道遣使走突厥君奕率騎到肅州  
 掩取之還至甘州護輪伏兵奪其節鉞從兵死戰力盡皆沒帝  
 痛惜之贈特進荊州大都督官護其葬師順岐州人論功累遷

鄯州都督隴右節度使終左領軍將軍

張守珪陝州河北人姿幹瓌壯性慷慨尚節義以戰功授平樂府別駕從郭虔瓘守北庭突厥侵輪臺遣守珪往援中道逢賊苦戰斬首千餘級禽一頓斤開元初敵復攻北庭遣山間道奏事因請引兵出蒲昌輪臺夾擊敗賊特加遊擊將軍再轉幽州良社府果毅刺史盧齊卿器之引與共坐許不十年子當節度是州願以子孫相託久之轉左金吾將軍為建康軍使王君奭死河西震懼拜為瓜州刺史充墨離軍使督餘衆修完故城版築方立敵又暴至衆咸失色守珪度剝夷之餘詎可矢石相礮須權以勝之乃偽為置酒會諸將作樂城上敵疑有備不敢攻伺其引去縱擊敗之自是修復解守收合流亡皆使復業會升瓜州為都督府即以守珪為都督州地沙磧不良樹藝常澍雪

水澆田其渠竭悉為敵毀材木無所出及是密禱于神一夕水暴至大木塞川而下因取以修復堰防水道如舊州民神之刻石紀事明年遷鄯州刺史隴右節度使二十一年兼御史中丞轉幽州長史河北副大使俄加採訪處置等使契丹奚連年梗邊前任趙含章薛楚玉等不能制帝聞每戰輒勝大喜其帥屬刺及牙官可突于恐懼遣使詐降遣右衛騎曹王悔就計其事將謀殺悔以叛會有別帥李過折與二人爭權不叶悔乘間誘之夜斬屈刺及突于盡滅其黨以降守珪出師次紫蒙川大閱軍實宴賞將士傳二首東都詔封李過折北平王使統其衆尋乃被殺二十三年守珪入朝獻捷行飲至禮御製詩寵之加右羽林大將軍兼御史大夫賜金綵授二子官立碑紀功二十六

年復討契丹餘黨于捺祿山鹵獲不訾會神將趙堪白真陀羅

等矯詔脅平盧軍使烏知義渡滹水擊叛奚且蹂其稼不勝而  
還守珪匿其敗妄奏克復事頗泄帝遣謁者牛仙童按實受其  
厚賂歸罪真陀羅逼令自縊還奏如狀後仙童賊敗事逮守珪  
以功貶括州刺史疽發背死 子獻誠少喜功名為政寬裕有  
機略隨方制變其簡廉不逮於父因亂事史思明令將兵守林  
陽郡公改寶應軍左廂兵馬使更封鄧國公來朝代宗禮賜尤  
渥擢山南西道節度使擒南山劇賊高玉兼領劍南東川時郭  
英又被殺率衆戰于梓州大敗乃舉從弟獻恭自代大曆二年  
入京拜戶部尚書知省事以病辭位卒 獻恭金吾將軍守  
子數有軍功任右羽林將軍代領劍南東川節度使大曆末破  
吐蕃於岷州久之拜東都留守檢校吏部尚書嘗固諫盧杞無

轉饒州世許其不撓子煦積閣至夏州節度使元和八年擢  
軍逐李進賢及判官嚴澈屠進賢家憲宗怒詔與河東王鐔連  
討許以便宜賜軍資緡三萬入捕亂卒蘇國珍等數百人誅之  
卒贈太子太傅 獻甫左驍衛將軍守琦子亦以軍功試光祿  
卿改殿中監賈耽討梁崇義渾瑊討朱泚皆從累遷至金吾將  
軍檢校工部尚書會李懷光叛吐蕃又盜邊令領禁兵戍咸陽  
累年兵農安悅貞元四年授邠寧節度使為將素有威嚴軍中  
憚之至則斷山浚塹選巖要地築烽堡請復鹽州及洪門洛原  
鎮屯兵遣兵馬使魏荒逐吐蕃築鹽夏二城蕃衆不敢入寇十

二年加左僕射卒贈司空

王忠嗣始名訓太原祁人徙家鄭縣父海賓以驍勇聞隴上任  
太子右衛率充豐安軍使封太谷男為郭知運先鋒禦吐蕃苦



戰渭州西界勝捷諸將嫉其功按兵不救衆寡不敵沒于陣玄  
宗憐其忠贈左金吾大將軍安西大都護忠嗣年九歲授尚輦  
奉御入見伏地號泣帝撫之曰此去病孤也賜今名命養禁中  
肅宗爲忠王時與游及長雄毅寡言勇敢自負上與論兵應對  
奮起器重之試守代州別駕大猾閉門自斂不敢干法數以輕  
騎出塞忠王言其年少有復讐志恐亡之帝乃詔還肅嵩復引  
爲河西兵馬使嵩將入朝請曰從公三年無以歸報天子願帥  
精銳與鹵立功會贊普大酋閱武鬱標川提刀略陣殺獲數千  
羊馬萬計嵩上其功帝大悅遷左威衛將軍檢校代北都督封  
清源縣男與皇甫惟明不叶爲所搆陷貶東陽府果毅河西節  
度杜希望薦其才畧帝遣赴鎮拔吐蕃新羅城以功授左威  
衛郎將專知兵馬秋吐蕃復來兵數萬壓官軍而陣衆寡不敵

舉軍皆恐忠嗣獨領所部左右馳突殺數百人賊衆相蹂三軍  
翼擊大敗賞功拜左金吾衛將軍領河東節度副使兼大同軍  
使尋攝御史大夫爲節度使二十九年移鎮朔方天寶初兼靈  
州都督北討奚戰桑乾河三遇三克耀武漢北高會而還時突  
厥葉護新有內難乃進軍積口振之以威烏蘇米施可汗請降  
以其方疆不信營于木刺蘭山謀得虛實因上平戎十八策縱  
反間於拔悉密與葛邏祿回紇三部使攻多羅斯城沙昆水竟  
斬米施傳首京師加左武衛大將軍築大同靜邊二城徙清塞  
橫野軍實之併受降振武爲一城自是敵不敢盜塞三載加兼  
河東節度採訪使進封縣公益務持重安邊嘗語人以平世爲  
將要在撫循其衆豈得竭中國力以幸功名故訓練士馬隨闕  
繕補士氣益盛日夜思戰輒縱詭間伺有隙則出奇兵襲擊故

所向無不克。軍每出，各名屬長，付以兵器，分給衆士，一弓一矢，皆誌姓名。軍還，按名等第，以是人知自勸，無一鏃亡失。由朔方至雲中數千里，當要害地，開拓舊城，或自創築，斥地各數百里。自張仁亶後，四十餘年，始繼其功。五載，惟明敗，劾詔持節判武威郡事，充河西隴右節度使。又權朔方河東，佩四將印，皆勁兵重地，控制萬里。近世未有。尋遷鴻臚卿，加金紫階，錄子震秘書丞。後數出戰，青海積石，鹵輒奔破。又討吐谷渾於墨離，平其國。在鎮日久，備詣邊事，得士卒心。及至河隴，頗不習物情，兼以功名富貴，自處望減於昔。乃許固讓朔方，河東二印，帝方事石堡城，問攻取計，奏言吐蕃舉國固守，若頓兵城下，費士數萬，然後可圖。恐所得不酬，所失請厲兵馬，待釁。帝意不決，董延光受詔下石堡，令分兵應接，又不立賞格，兵馬使李光弼說曰：大夫愛

惜士卒，有拒延光心，雖名受詔，實奪其謀。然今已付萬衆，重惜數萬段，何由以賈士勇？有如不捷，讒言歸罪，受禍必先。答曰：吾固審之，得一城不足制敵，失之未害於國。吾忍以數萬人命，易一官哉！明日見責，不失一金。吾羽林或黔中上佐耳。光弼趨出，曰：大夫乃古人行事，又何言？安祿山方城，雄武扼飛狐，塞復請助役，欲遂留其兵，因先期至，不見而還。上言祿山且亂，李林甫惡之，使人誣告在昔嘗養宮中，今欲奉太子，詔付三司訊驗，罪應死。哥舒翰方有寵，極言救之，帝怒起入禁中，叩頭而前，請以官爵贖其罪，言辭慷慨，聲淚俱下。帝意解，貶漢陽太守。久之，徙漢東郡。卒年四十五。後延光過期不克，果訴其阻兵及翰引兵拔石堡死亡略盡，咸如所料。故世號名將，遇朔方互市，常高馬直，諸蕃爭來，其馬浸少。唐兵日壯，後又請徙牧馬九千以實河

隴迄天寶末季息益蕃寶應元年追贈兵部尚書

哥舒翰本突騎施首領哥舒部之裔因以為氏祖沮左清道率世居安西家富于財父道元安西副都護翰少儻好任俠重然諾略通春秋大義初補效穀府果毅事河西節度王使使攻新城稍知名王忠嗣補為衙將疎財務施士多歸之轉大斗軍副使遷左衛郎將拒吐蕃于苦拔海吐蕃衆從山上分三行差池而下翰持半段槍迎擊所向披靡名蓋三軍天寶六載擢右武衛將軍關西都知兵馬使充河源軍使吐蕃每遇麥熟輒以兵來取翰先使王難得楊景暉等設伏積石軍東南谷吐蕃騎至翰自城中馳出伏起塵鬪悉殺之無隻馬還入朝上與語悅之拜鴻臚卿俄攝御史中丞西平郡太守遂代忠嗣為隴右度支營田副大使知節度事築神威軍於青海上吐蕃攻破之更

築於龍駒司號應龍城其川原宜畜牧徙流入戍之自是吐蕃不敢近青海八載命以朔方河東羣牧十萬衆攻吐蕃石堡城路遙而險久不能拔梓其麾下將高秀巖張守瑜將斬之秀巖請更限三日如期而下錄功拜特進子授五品官賜物千匹莊宅各一所加御史大夫十一載拜開府儀同三司入朝與祿山不協上使高力士和解之久之進封涼國公食實封三百戶兼領河西節度楊國忠與祿山有憾發其反狀故厚結翰進太子太保封西平郡王倍增封戶以風痺廢祿山反復起為皇太子先鋒兵馬元帥以田良丘充行軍司馬王思禮鉗耳大福李承光蘇法鼎管崇嗣及蕃將火拔歸仁李武定渾瑊契苾寧等為裨將統河隴朔方蕃漢兵共二十萬拒賊於潼關上御勤政樓勞遣百僚郊餞先驅牙旗觸門墮旄竿折斬執旗者十五載再

加左僕射同中書門下平章事時祿山以誅國忠爲名思禮勸翰留兵三萬守關悉以精銳回誅國忠此漢挫七國之計翰心許未發謀頗泄國忠大懼入見帝曰兵貴防後今潼關衆雖盛而無後殿萬有不利京師受驚請選監牧小兒三千訓練苑中更募萬人屯於灞上以腹心杜乾運爲將詔皆從之翰疑爲圖已表請乾運隸麾下因名計事斬之自是兩心咸不自安翰疾甚以軍務委良丘騎兵屬思禮步屬承光二人爭長不叶故人無鬪志翰奏祿山雖竊河朔人心未歸請持重以待其離隙可不血刃就擒國忠復恐謀已屢奏命率衆速出討之翰奏賊兵遠來利于速戰王師務獲萬全利在堅守不利輕出且名四方兵未集宜觀事勢若輕出關是墮其計然以中使相繼督責翰不得已引師而東六月四日次于靈寶縣西原八日與賊交戰

官軍南迫險峭北臨黃河乾祐衆數千已先屯要害翰及良丘等浮船中流以觀進退輕乾祐兵少遂促將士令進道阻擁塞無復隊伍適東風急賊縱火焚勳將士掩而開目不得因爲所乘自相排擠皆墜于河後見前隕悉潰互相填委死者數萬呼叫振天爭投北岸翰與數百騎馳歸爲歸仁執降祿山僞授司空使招李光弼來瑱魯炆等報書讓其不死祿山知事無濟囚于苑中潛殺之其後贈太尉謚武愍翰爲將嚴峻少恩不恤士卒肆志報怨故及于禍子曜字子明方八歲哀號憤切玄宗名見授尚輦奉御遷累光祿鴻臚二卿副李光弼討河北降安太清救宋州有功改殿中監襲封爲東都鎮守兵馬使德宗立名爲左龍武大將軍使將鳳翔邠寧涇原奉天好畤兵萬人討李希烈帝名見問卿治兵孰與父賢對曰臣安敢比先臣但斬

長蛇殪封豕待罪私室臣之願也及行帝祖通化門牙干又拆  
人為憂之初收汝州禽偽刺史周晃以獻希烈退保許州有詔  
督戰曜進次賴橋雷震軍中七馬斃曜懼還屯襄城希烈遣萬  
人薄城苦戰破之居數月希烈自率兵三萬圍曜築甬道矢集  
如雨賴李勉解去後為東都畿汝潁節度使遷河南尹終右驍  
衛上將軍贈幽州大都督子七俱以儒聞岍茂才高第有節槩  
嶠嶷岷皆明經擢第

王思禮高麗人入居營州父虔威朔方軍將思禮少習戰鬪與  
哥舒翰同籍王忠嗣麾下及翰領隴右復與中郎將周祕事翰  
以拔石堡城功授右金吾衛將軍關西兵馬使兼河源軍使從  
討九曲後期當斬臨刑釋之俄加金城太守祿山反翰奏兼太  
常卿開府儀同三司充元帥府馬軍都將委以軍事潼關失守

與呂崇賁李承光同走行在肅宗責不堅守引至蘄下將斬之  
宰相房琯固諫令收後效復得赦免獨斬承光尋副宰相戰便橋  
不利更為關內行營節度河西隴右伊西行營兵馬使屯守武  
功賊將安守忠來戰退保扶風賊分兵略太和關去鳳翔五十  
里行在戒嚴至德二年從元帥廣平王收西京領兵先入清宮  
繼從子儀戰陝城曲沃新店敗賊軍收京東又於絳郡破賊六  
千器械山積牛羊萬計遷兵部尚書封霍國公食實戶五百尋  
兼潞沁等州節度使總關中潞州行營兵三萬騎八千同圍相  
州軍潰惟思禮獨完還破史思明別將萬餘眾於直干嶺光弼  
徙河陽代為太原尹河東節度副大使兼御史大夫上元元年  
加司空二年薨贈太尉諡武烈生平善守禦短攻戰與翰密謀  
誣殺戶部尚書安思順及弟太僕卿元貞與祿山潛通徙其家

屬嶺外天下寃之然持法嚴整士不敢犯在太原器甲完精儲粟至百萬斛人以是稱高仙芝遼東人父舍雞從河西軍累功至四鎮牙將諸衛將軍仙芝美姿容善騎射年二十餘從父至安西以功補遊擊將軍父憂其儒緩節度使夫蒙靈睿更加厚遇表為安西副都護四鎮都知兵馬使吐蕃誘小勃律國王妻以女連西北二十餘國皆羈屬之自田仁琬蓋嘉運三討皆無功天寶六載詔仙芝以步騎萬人往征乃分軍為三使疏勒守捉趙崇玘自北谷道入撥換守捉賈崇瓘自赤佛道而巴與監軍邊令誠自護密國入皆約會吐蕃連雲堡至婆勒川水漲不得渡殺牲以祭已而畢渡喜日向使賊來擊我必無類今旗不露羈不濡兵皆成列是天以賊賜我時不可失因與令誠鼓衆登山日未中破之拔其

城斬五千級生擒人馬千餘衣資器甲數萬仙芝欲遂深入令誠懼不肯行乃留羸弱三千使守行營而自引精銳行三日過坦駒嶺竟渡弱水遂至阿弩越城遣將軍席元慶以精騎一千先往給小勃律王曰吾假道趨大勃律不窺若城也城中大酋領皆素為吐蕃腹心仙芝密令元慶曰若酋領逃者第出詔書呼之賜以繒絲至則縛以待我元慶如令仙芝至乃悉斬之王及妻逃山穴中不可得招喻出降因平其國急遣元慶斷弱水藤橋吐蕃暮引兵至不得度連震拂林大食諸部七十二國皆降附遣判官王庭芬奏捷還至河西靈睿因捷書不待已大怒欲斬之仙芝不知所為令誠密奏於朝言仙芝立奇功今將就死後孰為朝廷用者帝乃召靈睿還擢仙芝鴻臚卿假御史中丞四鎮節度使以代之八載入朝加特進兼左金吾大將軍子

授五品官九載討石國俘其王以獻斬之闕下進開府儀同三司右羽林大將軍封密雲郡公祿山反命副榮王琬為元帥領飛騎彊騎及朔方隴右等兵復出禁財募關輔士五萬出潼關東討帝御勤政樓賜宴臨行幸望春亭勞遣令誠仍監其軍次于陝郡值封常清敗還仙芝急乃開太原倉悉以所有賜士卒焚其餘者引兵趨潼關勒兵繕守士氣稍振賊攻不得入引還會令誠數有所求仙芝不能應至是入奏事具言常清以賊搖衆仙芝棄地數百里腹盜廩賜帝大怒使卽軍中斬二人仙芝聞命語令誠曰我退罪也死不敢辭奈何誣我為盜資糧上天下地三軍皆在君豈不知又顧麾下曰我募若輩本欲破賊取重賞而賊勢方銳故遷延至此意以保固關輔有罪若輩可言不爾當呼枉軍中咸呼曰枉其聲殷地遂就死

封常清蒲州猗氏人從外祖犯罪流安西教之讀書多所該究頗負才學外祖死孤貧無依年過三十未有名值高仙芝出軍奏僉從三十餘人投牒請豫初陋其貌不納日候門下曰我慕公義願事鞭勒故無媒自前公何見拒之深仙芝不得已竄名僉中會達奚諸部叛詔仙芝邀擊以二千騎追躡禽滅略盡常清於幕下潛作露布具記井泉次舍遇賊形勢克獲謀略條最明審仙芝取讀之皆意所欲出乃大駭異卽用之由是知名軍還以功授疊州果毅從破小勃律擢慶王府錄事參軍充節度判官專知四鎮倉庫屯田甲仗度支營田事仙芝每出征討常知留務果於決斷胷無碍事會仙芝托乳母子鄭德詮主家事署為郎將輕易常清一日自外相遇走馬突其騶士乃命左右引至廷中離席言曰吾起細微荷中丞公過聽以主留事汝安

得無禮。今須暫假汝一死。以肅吾軍。因杖死。以面仆地。曳出之。仙芝妻及乳母哭救不能得。復擊殺諸將有罪者二人。遽以狀白仙芝。憚其公不敢讓。常清亦不謝。自是軍中股慄畏之。後由河西節度判官入爲左羽林上將軍。久之攝御史中丞。除安西副大都護。知四鎮節度事。十三載。加御史大夫。改北庭都護。持節伊西節度使。與二子五品官。賜第一區。性勤儉耐勞。苦賞罰。分明出軍。常乘驟私廐。裁畜二馬。明年入朝。帝引見。問討安祿山策。大言天下太平。久人不知戰。然事有逆順。勢有奇變。臣請馳至東京。悉募驍勇。計日渡河。取逆賊首以獻。闕下玄宗大以爲然。明日拜范陽節度副大使。乘驛赴東京。募兵得六萬人。部分旗幟。斷河陽橋以守。然皆市井庸保。會顏真卿遣李平入奏。常清取表發視。卽倚帳作書。勸以堅守。且傳購祿山檄數十道。

與之。令分曉諸郡。復遣使表論成敗。皆不得對。俄祿山渡河陷滎陽。先驅至葵。初使驍騎拒之。殺拓羯數十百人。俄大軍繼至。退入上東門。戰不利。賊鼓而進。劫官吏。再戰於都亭驛。又不勝。引兵守宣仁門。復敗。乃自提象門出。奔陝。語高仙芝曰。賊銳甚難與爭鋒。潼關無兵。萬一奔突京師。且危。不如急守從之。敗書聞。猶欲見上。陳討賊事。徑入關。至渭南。有詔削官爵。使戴罪隸。仙芝效力。乃令衣黑衣。監左右軍。無何。賜死。泣曰。吾所以不死者。恐汗衣冠戮賊手。今乃甘心就戮。人爲哀之。

衛伯玉少有膂力。精武藝。天寶中。仗策從軍。隸安西府。積勞至員外諸衛將軍。見中原亂。思立功名。慨赴長安。肅宗拜爲神策兵馬使。出鎮陝州。行營乾元二年。與賊將李歸仁戰。殲子坂。破其騎五千。積屍滿野。獲馬六百匹。遷羽林大將軍。徙四鎮北庭。



行營節度使俄復領神策軍上元二年又破史朝義於永寧加  
特進封河東郡公廣德元年拜荆南節度使進封城陽郡王自  
此以爵自縻狃於流俗大曆初母憂營謀起復諷將吏留已不  
受詔旨大為時議所醜以朝京師卒

尉遲勝本于闐國王天寶中入朝獻名玉良馬玄宗妻以宗室  
之女授右威衛將軍毗沙府都督既而與高仙芝擊破薩毗播  
仙進光祿卿祿山反使弟曜攝國事勝身率兵赴難國人固留  
質其少女而行肅宗嘉之拜特進兼殿中監廣德中進驃騎大  
將軍遣還固請授國於曜已留宿衛加開府儀同三司封武都  
郡王實封百戶乃穿築池觀厚結賓客士大夫多從之游後扈  
德宗至興元拜右領軍將軍貞元初曜言本國以嫡承嗣今請  
立勝子銳帝欲從之勝復固辭以曜代行國事久國人安之銳

生京華不習其俗不可遣人多賢其有讓勝後歷睦原二王傅  
卒贈涼州都督

尚可孤本東莞宇文鮮卑之別種世處松漠間天寶末隸安祿  
山復事史思明上元中歸降累授左右威衛大將軍封白水縣  
伯以功試太常卿徙封馮翊郡公食實戶一百五十選蒞神策  
軍魚朝恩器其勇養以為子改名智德使將兵屯扶風武功歷  
十餘年隊伍閑整朝恩死賜姓名李嘉勳李希烈叛擢為荆襄  
招討應援使累戰有功復本姓名朱泚亂復召率兵三千道襄  
鄧而西屬賊兵銳乃壁七盤僞將仇敬忠等來攻擊卻之遂收  
藍田將遷梁州又命引兵守灊上拜神策京畿渭南商州節度  
招討等使敬忠復來拒戰擊斬之李晟收長安為先鋒以功加  
尚書右僕射封馮翊郡王食實戶二百又會諸軍進討李懷光

次沙苑卒于軍贈司空爲人性謹審沉壯有動勞未嘗自矜御  
衆公嚴爲晟所稱

來瑱邠州永壽人父曜奮起行間開元末爲鴻臚卿持節積西  
副大使四鎮節度使著名西邊終右領軍大將軍瑱少尚名節  
慷慨有大志頗涉書史天寶初從父四鎮由左贊善大夫遷殿  
中侍御史爲伊西北庭行軍司馬拾遺張鎬薦以能斷大事有  
禦侮才擢潁川太守充招討使居母喪以孝聞祿山方攻潁川  
張垫薦起復城中多積粟完堙自如與賊戰滅下手射皆應弦  
仆前後俘殺甚衆賊使父時故將畢思琛來招不應以功就加  
防禦使攝御史中丞充河淮游奕逐要招討使救南陽不勝人  
情恟懼賴以綏撫訓練舉動安重賊不得侵改淮南西道節度  
兩京平加開府儀同三司封國公食二百戶賜姓吳改轉陝

號節度兼潼關防禦團練鎮守使乾元二年襄州將張維瑾殺  
其帥史翽加兼御史大夫山南東道節度襄鄧均房金商隨郢  
復十州觀察處置等使旣至維瑾降上元二年春破史思明餘  
黨於魯山俘賊渠又戰汝州獲馬牛橐駝凡兩戰斬首萬級撫  
安襄漢士庶方宜其政肅宗召入京諷衆留已至鄧復還上聞  
惡之明年改襄鄧唐復隨郢六州俄而申州王仲昇與賊戰被  
禽瑱碩望不卽救司馬裴茂者始以蔭爲京兆司錄叅軍謀奪  
其位表言瑱善謀而勇恐後難制宜早圖之帝乃陰奪其權外  
示寵榮令節度淮西申安蘄黃光沔兼河南陳豫許鄭汴曹宋  
潁泗十五州加茂御史中丞襄鄧等七州防禦使以代瑱瑱懼  
表言淮西無糧須麥收始可上道茂乃於商州募兵以窺去就  
代宗立又諷衆固留復授襄州節度奉義軍及渭北兵馬使密

詔茂圖之寶應元年五月茂自均州浮漢而下督軍五千陣穀水北瑱以兵迎茂大呼曰吾奉詔留鎮此州爾何名而來且示以詔書茂軍皆曰僞也爭射之瑱走旗下副使薛南陽引奇兵三百出其背與瑱夾擊殺獲幾盡茂脫身走至申口瑱併妻子擒送京師責以輕復寡謀流費州賜死瑱因入朝謝罪帝待之無疑拜兵部尚書同中書門下平章事充山陵使程元振疾之發瑱與巫祝言不順會王仲昇歸又言與賊合謀致已久陷帝積怒下詔削除官爵貶播川縣尉及鄂賜死籍其家棧書郎殷亮爲備棺衾以葬帝徐悟以他事罪元振流溱州而以梁崇義爲節度使爲瑱立祠四時致饗避瑱廳事不處哀祈禮葬詔可  
廣德元年追復官爵

魯炆幽州薊人身長七尺略通書史初蔭補左羽林長上哥舒

翰引爲別奏顏真卿嘗使隴右問翰所得才武以炆示之與曲環咸從破石堡城收河曲遷左武衛將軍復以破吐蕃跳盪功除右領軍大將軍賜紫金魚袋祿山反拜上洛太守名對於帝前畫攻守勢即轉南陽兼守捉防禦使封金鄉郡公尋兼御史大夫充山南西道節度使與山南東徐浩嶺南何履光黔中趙國珍一同討賊時三帥尚未至先率子弟五萬屯葉縣北渚水南賊將武令珣畢思琛等來戰於營西乘風縱火鬱氣奔營士不可止炆與中人薛道東挺身走舉衆沒賊資糧械悉以富賊炆擊散兵保南陽潼關失守賊將田承嗣圍城來瑒合襄陽魏仲犀兵來援仲犀弟孟馴率兵至明府橋望賊而走南陽食盡餓者枕藉朝廷遣使者曹日昇宣慰加炆特進太僕卿不得入顏真卿與中官馮廷瓌勸以乘間致命人心始固日昇復單

騎趨襄陽要糧餉令領兵千人由音聲道運至方再支持數月被圍一年晝夜拒戰人至相食卒無叛者至德二載五月率眾突圍走襄陽承嗣尾擊吳殊死戰二日斬獲甚眾賊引去俄拜御史大夫襄鄧十州節度使時襄漢數百里鄉聚蕩然舉無樵煙賊初欲剽亂江湖賴吳適扼其衝南楚獲完二京平策勳封岐國公實封一百戶乾元元年又加淮西節度鄧州刺史領淮西襄陽兩鎮步卒萬人騎三百同九節度兵圍相州會王師不利吳中流矢所過剽奪其軍尤甚乃徙吳鄭陳亳節度使至新鄭羞憐仰藥死年五十七

曲環陝州安邑人父彬監使隴右因家焉環少喜兵法資勇敢善騎射從收洪濟等城累授果毅別將祿山反徙魯吳鄧州與武令珣戰尤力加左清道率從李抱王屯河陽又自將兵守澤

州破賊銳將安曉拜羽林將軍復與諸將討史朝義平河北累轉金吾大將軍大曆中戍隴州數破吐蕃加特進兼太常卿德宗初敵寇劔南詔以邠隴兵五千馳救收七盤城威武軍維茂等州敵破走威名大振加太子賓客賜名馬討涇州劉文喜遷開府儀同三司兼御史中丞封晉昌郡王邠隴都知兵馬使又與劉元佐救徐州敗李納加御史大夫建中三年擢邠隴行營節度使李希烈陷汴州環守寧陵戰陳州斬賊三萬五千級禽其將翟崇暉進檢校工部尚書兼陳州刺史希烈平改陳許節度賜封三百戶二州比為寇衝民苦剽鹵轉客他縣環勤身節用寬賦斂簡條教不三歲歸者襁係訓農治兵穀食豐衍轉檢校左僕射卒年七十四贈司空

王栖曜濮州濮陽人少遊鄉學無所知名會尚衡起義討安祿

山署爲牙將下兗郛諸縣軍威稍振改衙前總管進攻曹州逆將邢趨然乘城號令一箭殞之城中氣懾遂拔曹州衙居節鎮表授右威衛將軍先鋒遊奕使隨入朝除試金吾衛將軍上元初浙東王璵奏爲節度馬軍兵馬使袁晁寇亂中丞袁倬奏與李長爲偏將連十餘戰生擒晁復郡邑十六授常州別駕浙西都知兵馬使時江左兵荒詔內常侍馬日新領汴滑軍五千鎮守日新貪暴賊帥蕭庭蘭乘衆怒逐之而劫其衆復乘栖曜遊奕遠郊脅與共圍蘇州見賊懈怠醉迷酒色栖曜反擊敗之遷試金吾大將軍李靈曜叛浙西觀察李涵俾將四千兵倚角破賊有功加銀青光祿大夫兼御史中丞李希烈陷汴乘勝東侵襲宋州浙西節度韓滉命將彊弩數千出其不意夜入寧陵希烈晨起矢及坐惺驚曰此江淮弩上也遂不敢東貞元初拜右

龍武大將軍俄轉鄆坊丹延節度觀察使檢校禮部尚書武庫史大夫卒於位贈右僕射諡曰成爲人性謹厚善騎射常將兵陟敵境忽遇遊騎立表百步外射輒破的敵相顧不敢動而去子茂元少好學上書德宗自薦擢試校書郎收太子贊善大夫呂元膺署東都防禦判官淄青留邸卒謀亂元膺率兵圍之半月士無敢先者茂元取一人斬之衆乃進賊遂奔潰累遷嶺南節度使蠻落安之以財交鄭注遷涇原節度使注敗悉出家貲餽兩軍得不誅反封濮陽郡侯召爲將作監領陳許節度會昌中徙鎮河陽會討劉稹以兼行營攻討使李德裕言其兵寡詔王宰領陳許合義成兵援之時已病功未成而卒贈司徒諡曰威

裴汾五世祖綽本疏勒王武德中來朝拜鷹揚大將軍封天山

弘簡錄卷四十三  
郡公留籍京兆玢初事金吾將軍論惟明為僚力從幸奉天以  
功封忠義郡王復從惟明鎮廊坊署偏將值王柅曜卒中軍將  
何朝宗夜縱火作亂玢匿不出遲明禽獻有詔并軍司馬崔輅  
斬之授玢同州刺史劉公濟擢為行軍司馬兼侍御史公濟卒  
代為節度觀察使兼御史大夫元和三年改山南西道其為治  
嚴稜苦節畏遠權勢不務貢奉蔬食敝履居處取避風雨而倉  
庫完實百姓安之入朝不事騶仗妻乘竹輿二侍婢黃碧縑服  
當世將帥未有及者以疾辭位卒贈左僕射諡曰節

弘簡錄卷四十三 終

弘簡錄卷四十四

明刑部員外郎仁和邵經邦弘齋學

皇清翰林院侍講學士四世孫遠平校閱

庶官 唐六之五

武職

劉昌

辛雲京

從弟京杲旻

邢君牙

張萬福

王虔休

李澄

伊慎

范希朝

閩巨源

楊朝晟

高固附

陽惠元

旻子

李觀

杜希全

朱忠亮

李白良

劉昌裔

孟元陽

韓全義

趙昌

高崇文

子承簡

李光顏

兄光進

烏重胤

附石洪李瑛

王沛

子逢

高霞寓

盧從史

高瑀

劉沔

石雄

曹華

郝玘

段佐附

史敬奉

劉昌字公明開封人出自行間少習騎射從河南張介然討安

強簡錄 卷四十四  
祿山授易州遂城府果毅適有事至宋州史朝義圍方亟城中  
食盡刺史李岑計蹙說以李光弼在河陽勢必來援計厩中  
麩藥可支二十日則救至矣岑聽之昌乃鎧盾登城大陳逆順  
賊攻稍緩外援果至城賴以完由是知名表聞超授左金吾衛  
郎將留光弼軍會卒王縉遣歸宋爲牙門將轉太僕卿兼許州  
別駕刺史李僧惠欲從李靈曜叛密遣僧神表開說僧惠召昌  
問計雪泣懇祈陳示逆順僧惠悟卽遣神表詣闕馳奏請自將  
討賊遂翦靈曜左翼卒不得逞事平李忠臣嫉殺僧惠昌潛遁  
劉玄佐刺許乃復其職轉太常卿兼華州別駕及鎮宣武擢爲  
左廂兵馬使李納反以師收考城充行營諸軍馬步都虞候檢  
校太子詹事兼御史中丞明年玄佐圍濮州令攝刺史李希烈  
陷汴玄佐遣將高翼襲其守襄邑城陷翼赴水死江淮大震時

昌以三千人守寧陵希烈衆五萬攻城相拒四十五日身不解  
甲深塹以遏地道凡有內顧者悉斬激勵將士咸有死志用能  
以一當十賊敗圍解玄佐大賞異之相對涕泣賊攻陳州刺史  
李公廉求援合玄佐浙西兵三萬救之未至五十里與賊遇昌  
晨歷其軍未得成列大破之擒賊將翟曜希烈退保蔡州自此  
不復侵軼詔加檢校左散騎常侍汴州平進檢校工部尚書封  
南川郡王增實封通前二百戶母憂贈梁國夫人起復金吾衛  
大將軍貞元三年玄佐入朝上因委以宣武士八千北出五原  
臨行斬逗遛沮事者三百人軍中懽服尋授京西北行營節度  
使歲餘除涇州刺史涇原節度兼四鎮北庭行營度支營田等  
使受詔城平涼以扼彈箏峽口命徒屯事旬餘而畢又於平涼  
西別築胡谷堡名曰彰信分兵援戍過其要衝開地二百餘里

加檢校右僕射收瘞被劫尸骸因感夢若有所謝上聞德宗下詔哀痛出內造衣服數百襲各具棺槨葬於淺水原建二塚大將曰旌義將士曰懷忠詔學士撰銘志祭文遣秘書孔述睿及內使素服設次牢饌祭之師徒莫不感泣十四年歸化堡亂逐大將張國誠詔昌經略誅亂首數百人復其任凡居西邊十五年強本節用墾田力農軍有羨食銳新器械障塞保寧以疾卒年六十四廢朝一日贈司空

辛雲京蘭州金城人客籍京兆世爲將家兄弟數人並知名于時雲京性沉毅有膽畧立志剛決每在戎行禽生斬馘功常冠軍遷特進太常卿史思明屯相州以銳兵四千襲滏陽與弟晏追破其衆至浪井授開府儀同三司代州刺史都督鎮北兵馬俄授太原尹進封金城郡王謹于治法下有犯絲毫罔貸至賞

功亦如之故軍中畏而信回紇入朝恃功鈔暴畏其威望遂不敢肆待以戎狄故禮數年大治加檢校右僕射同中書門下平章事卒年五十五代宗發哀流涕贈太尉謚忠獻葬日命中使弔祀將相祭者至七十餘幄喪車移畧乃得去德宗時第功以次至德將相從弟京杲與晏少以策于信安王禕評詔加異俱從李光弼出井陘定恒趙督趨盩先驅力戰嘉山肅宗異之名見此爲韓彭關張之流累遷鴻臚卿名爲英武軍使代宗立封肅國公遷左金吾衛大將軍爵晉昌郡王歷湖南觀察使至工部尚書致仕朱泚亂老病不能從西嚮慟而卒贈太子少保晏署太原三城使東都陷退守河陽卒于屯

邢君牙瀛州樂壽人少從幽薊平盧軍以戰功歷果毅折衝郎將平盧兵馬使從侯希逸涉海入青州又從田神功討劉展咸



有功歷將軍試光祿卿神功鎮兗鄆遣將防秋兵屯好畤吐蕃  
犯京以蒞禁軍扈從代宗幸陝加鴻臚卿累封河間郡公建中  
初李晟從馬燧討田悅以爲都將戰于武安襄國洹水魏縣清  
豐生擒斬馘功成居最又率先倍道赴德宗奉天之難晟徙屯  
渭橋軍中便宜惟君牙得豫收京加御史大夫檢校散騎常侍  
晟轉鳳翔數行邊常令知留後事軍府安悅入朝代爲鳳翔尹  
隴右觀察使檢校工部尚書俄領節度使勸耕講戰增修守備  
吐蕃不敢侵又城隴州平戎川號永信城進檢校右僕射卒年  
七十一贈司空爲人屈已好士有布衣張汾干之軒然上坐會  
擿簿書怒吏盜設宴錢五萬將置于罪汾不謝而去語人曰吾  
在京時聞君牙一時豪俊今乃與設宴吏論錢云何君牙聞之  
慙遽釋吏引爲上客

張萬福魏州元城人三世明經仕止縣令州佐萬福收學騎射  
從王斛斯以別校征遼東有功李暉伐劉展署爲部將效首萬  
級累攝壽州刺史舒廬壽都團練使押送租賦詣都至頴爲盜  
所劫萬福領輕兵尾襲賊倉卒不虞其至悉擒之盡得所亡并  
先掠人妻女財蓄萬計真拜刺史兼淮南節度副使節度崔圓  
忌之改鴻臚卿使將千人鎮壽州時平盧行軍司馬許杲將卒  
三千駐濠州陰窺淮南圓使萬福再攝濠州當塗賊陳莊陷舒  
州圓又令攝舒州刺史督賊萬福不以爲恨悉窮破林黨代宗  
聞其名召赴京師屬以許杲因前謝曰陛下以一杲名臣如河  
北諸叛將欲以屬何人帝笑曰且爲朕了此事卽大用卿乃拜  
和州刺史兼行營防禦使杲聞其至果懼徙屯上元過楚州大  
掠節度使韋元甫使萬福追討未至杲將康自勸逐其主轉寇

淮東萬福倍道追殺之盡還所剽於民帝下詔褒美賜襲衣官錦久之詔率本鎮兵千五百人防秋京西帶利州刺史鎮咸陽因留宿衛李正己反屯兵埇橋江淮漕艘及進奉船千餘不敢踰渦口德宗拜萬福濠州刺史即馳至立馬于岸悉發所滯舟相銜以進淄青兵馬倚岸熟視不敢動改泗州刺史辭老名還授右金吾將軍圖形凌煙閣諫官陽城等諫止裴延齡入相詣延英門伏閣不去帝震怒左右方懼禍出不測萬福於閣前徧揖城等勉以益勵大言稱賀曰國有直臣天下太平矣孰意老臣年八十見茲盛事天下聞之愈重其名俄以工部尚書致仕卒年九十自始至終祿食七十年未嘗一日言病蒞凡九州皆有惠愛陳少游滯縱因李希烈反悉質部刺史妻子送揚州萬福獨不遣語使者轉白妻老且醜不足恩公意魏州饑令兒子

將米百車為糜哺之贖還自賣者給資而遣人以此稱

王虔休字君佐汝州梁縣人本名延貴少涉學有材武以信義為鄉黨畏慕大曆中刺史李深奏為裨將李抱真素聞其名厚幣招之署澤潞兵馬使從討河北戰雙崗臨洛以功擢步軍都虞候累加御史中丞至大夫封同昌郡王實封百戶抱真卒裨將元仲經等謀樹其子緘一軍思亂虔休正色語以軍州為上所主帥亡當稟命何故安謀眾服其言謀遂寢德宗嘉之會邕王領昭義節度大使擢虔休左司馬知留後事賜今名號令撫循軍中大治司馬元誼先據洛州叛遣將李廷芝討之戰于長橋斬級數百又敗之鷄澤決水灌城遣掌書記盧頭入見為陳利害誼乃奔魏授瑒洛州別駕以守治潞二歲真授昭義節度使檢校工部尚書始屬城州縣守宰多署他職不親政故治苟

簡至是悉增俸廩遣就部人以安妥卒年六十二贈左僕射謚曰敬爲人性恪敏節用度旣沒所部帑廩皆可支數歲先時有太常樂工劉玠至潞令撰繼天誕聖樂因帝誕日以獻其樂以宮爲調示五音有君也以土爲德本五運在中也奏二十五疊法二十四氣而成一歲疊十六拍象元凱登庸于朝也後中和樂本于此子麗成等十人並補太學生

李澄遼東襄平人隋蒲山公寬之遠胄父鎬清江太守徙居京兆澄初以勇慄爲江淮李暉府偏將建中初從李勉帥汴表澄滑州刺史遇李希烈叛以城降僞授尚書令節度永平軍興元初密遣盧融問道奉表詣德宗行在蠓詔授刑部尚書汴滑節度使封隴西郡公度希烈兵少不能制已悉燔旗節自歸收兵部尚書封武威郡王賜實封五百戶希烈奔汝南澄引兵取汴

屯于北門賊將田懷珍自東門納劉洽師比澄入洽已保子城澄乃舍浚儀兩軍爭忿未能安會賊將孫液以鄭州送欵澄遣子清馳赴納之詔授清檢校太子賓客易名克寧貞元初遷澄尚書左僕射義成軍節度二年卒年五十四贈司空克寧闕不發喪欲自領節度殺南平司馬馬鉉將爲亂劉洽遣使諭止詔以賈耽代鎮克寧方護喪歸

伊慎字寡悔兗州人通春秋戰國策并天官五行書以善騎射爲折衝果毅喪母將合葬不知父墓晝夜號哭夢有導者發壙視之果得乃寔哥舒晃叛路嗣恭選爲先鋒疾戰破賊斬級三千遂下韶州再戰把江口水湍駛爲桴寘薪乘風縱火賊焚溺不可計與諸將追斬晃于泔溪函首闕庭賞功授連州長史加團練副使稍遷江州別駕會討梁崇義不受李希烈署官獨率

所部破之於蠻水俘卒三萬襄漢平功多希烈愛其材數遺馬幣欲縻止之用計遁歸明年希烈反嗣曹王臯至鍾陵得而壯之拔爲大將希烈詐爲慎書遺以七屬甲帝遣中使卽軍中斬之臯表列其誣未報賊沂江徇地臯授慎兵勉令自効大破賊兵三千朝廷信而釋之累收黃梅次長平殺賊將韓霜露斬級千餘拔蔡山寨復降賊將李良遂下蘄州優詔褒異卽拜蘄州刺史試太子詹事兼御史中丞封南充郡王仍充兵馬節度使德宗幸梁洋包佶轉東南糧幣赴之次于蘄口希烈遣將杜少誠以萬兵遏江道俾不得西慎選士七千列三屯相望偃旗以待少誠分圍未合慎自中屯鼓之諸屯悉出奮擊賊亂少誠走斬別將許少華封尸爲京冢潛無留艱連圍安州希烈甥劉戒虛以兵來援慎逆擊于應山禽之縛示城下遂開門降以功拜

安州刺史兼御史大夫賜實封百戶攻隋州殺虜鄉斬首五百級諭降李惠登卽薦爲刺史拜慎安黃州節度管內度支營田觀察等使吳少誠反詔領步騎五千兼統荆湖南江西兵當一面遇賊三州港營義陽戰于申州城南斬首數千加檢校刑部尚書貞元末安黃賜名奉義軍卽爲節度使檢校右僕射憲宗卽位以兵付其子宥身入朝真拜右僕射兼金吾大將軍以錢賂宦人第五從直求帥河中事暴戾右衛將軍數月復舊改右衛上將軍卒太子太保謚曰壯繆

范希朝字致君河中虞鄉人初事韓游瓌爲邠寧軍虞候赴奉天難戰守有功累兼御史中丞擢寧州刺史治軍整毅游瓌畏其逼已將伺隙殺之希朝懼奔鳳翔德宗名至京宿衛隸左神策軍貞元四年游瓌臨政無狀邠將請以代之希朝自謂始徇

而來終代其任非所以防覬覦安反仄也固讓於張獻甫軍中  
憚獻甫嚴以兵脅監軍使固請必得希朝乃拜邠寧節度副使  
俾佐獻甫俄遷振武節度使檢校禮部尚書党項室韋雜居川  
阜暴掠爲患日夕輒肆謂之刮城門居民駭懼鮮有寧日希朝  
周知要害制屯堡斥邏嚴密人始獲安小有竊取必殺無赦鹵  
人憚伏若神先時帥至必效駝馬一無所納積十四年賊保邊  
塞不敢肆橫舊城中外少樹遍蔣榆柳越歲成林貞元末年諸  
鎮迷職者少因獨請入朝帝大悅拜檢校右僕射兼右金吾衛  
大將軍代以行軍司馬閻巨源順宗時王叔文將授其黨韓泰  
以兵械利希朝易制川爲右神策統軍克京西諸城鎮行營節  
度使鎮奉天不久罷憲宗立仍舊官改左僕射俄檢校司空出  
爲朔方靈鹽節度使沙陀衆始強招致其族自甘涼赴鎮衆且

萬餘資其安戢後以之討賊所在有功人以此趙充國久之移  
鎮河東率師討王承宗敗之木刀溝然以老病玩寇不前不能  
有大功還朝改左龍武統軍以太子太保致仕卒贈太子太師  
諡宣武巨源初爲勝州刺史以材力進無他智能然以寬厚爲  
將卒所懷至邠寧節度使檢校左僕射卒

楊朝晟字叔明夏州人典于行間以功授甘泉府果毅建中初  
從李懷光討劉文喜斬獲功多加驃騎大將軍又從唐朝臣討  
李納爲先鋒兵馬使有功授開府儀同檢校太子賓客懷光赴  
奉天難屬以千兵下咸陽加御史中丞賜實封百五十戶其父  
懷賓爲韓游瓌將懷光反游瓌退保邠寧留後張昕大索軍實  
募士萬人先趨河中以應懷光懷賓與高固夜以數十騎斬昕  
及同謀者告于行在德宗勞問授懷賓兼御史中丞朝晟泣見

懷光曰父立功子不可主兵遂繫之懷賓與諸將共平懷光戰甚力帝原朝晟罪卽除游瓌都虞候父子皆開府軍中以爲榮後詔張獻甫代游瓌軍中有裴滿者扇亂密計首惡斬二百餘人獻甫得入加御史大夫貞元九年城鹽州發卒護境命屯木波堡會獻甫卒有詔代爲邠寧節度使母喪起復左金吾大將軍邠州刺史十三年自率部兵請築方渠合道木波三城要路帝問前城五原與師七萬今何易邪對曰鹽州之役敵先知之今臣境迫敵料王師不十萬勢難輕入密發部兵十日至塞下未二旬城畢積芻聚糧留卒守之寇至不可拔此萬全計也若大發兵閱月乃至敵知必來戰則不暇城矣帝納其策師次方渠水乏有青蛇降隨其走跡木從而流使築防戍之遂爲淳州十飲仰足圖上其事帝詔置祠名應聖泉以蕃

害乃引去復城馬嶺而歸開地三百餘里固四世繼保中爲北庭安撫使禽車鼻可汗以功拜安東都護固生後家轉賣爲渾城童奴呼爲黃荅性敏惠有膂力善騎射能讀左氏春秋城愛之如已子因舉齊高固名命之妻以乳媪女從屯朔方戰奉天賊突入東壅門固引銳士長刀連砍數賊一以當百曳車塞竇賊不能入論功封渤海郡王以斬張昕功拜檢校右散騎常侍前軍兵馬使十七年朝晟卒軍中皆屬意之會將併邠州朔方爲一軍朝議用渾城舊將李朝采爲節度固乃逃匿軍中堅以爲請帝遣中使薛盈珍賚朝命至軍中拜之加檢校工部尚書固本宿將且寬厚一軍始安乃徇曰毋殺人毋肆掠衆咸順悅順宗立就轉檢校禮部憲宗時加右僕射數年入爲右羽林統軍卒贈陝州大都督

陽惠元平州人以趨勇奮忠毅多權畧稱爲名將初隸平盧劉正臣後從田神功李忠臣浮海入青州詔以兵隸神策充京西兵馬使鎮奉天時諸鎮跋扈或傳上欲東封以汴州城隘命增築之淄青李正己聞之移兵萬人屯曹州魏博田悅亦增兵河上河南大擾詔惠元移兵萬二千以備關東德宗御望春樓誓師因勞遣諸將酒至將士不敢飲帝問故對曰初發奉天臣與衆約不立功不飲酒以是不敢食其言帝咨歎不已璽書慰勞俄田悅叛復詔領兵三千同諸將致討戰御河奪三橋其功居多加檢校工部尚書攝貝州刺史令以兵屬李懷光與李晟李建徽聯營便橋晟知懷光且叛移屯東渭橋奏請合兩軍皆往以備賊爲解趣裝進道則懷光計無所施帝不從是夕懷光奪二軍二將咸走奉天懷光遣將冉宗馳騎追及於好時惠元被

髮呼天血流出背袒襦戰而死二子晟嵩匿井中皆及害建徽得免詔贈惠元左僕射晟殿中監嵩邠州刺史少子旻字公素時被八創墮別井因救得免後歷邢州刺史盧從史被縛潞有驍卒五千來奔咸受從史恩以子視者旻閉城不內衆皆哭曰奴失帥今公有完城又度支錢百萬在府少賜之爲表天子求旻旻開諭禍福遣之衆感悟遂遷軍憲宗嘉之遷易州刺史討蔡爲唐州刺史提兵深入二百里薄申州拔外郭殘其垣以功加御史中丞容州西原蠻反授本州經畧招討使擊定之進御史大夫合邕容兩管爲一道卒贈左散騎常侍

李觀少習武藝沈厚寡言有將帥識度其先自趙郡徙洛陽乾元中以策干郭子儀遣佐坊州刺史吳伯充防遏使以親喪解寓居塾屋會吐蕃內寇觀率鄉里子姓千人守黑水西蕃不敢

侵嶺南節度楊慎微奏為偏將徐浩李勉相繼倚以軍政平劇賊馮崇道遷大將試殿中監名為右龍武將軍涇師叛觀適番上卽領兵千餘扈駕奉天詔為都巡警使訓練諸軍增募五千餘眾鞏旂謹豎士氣益振上頗倚賴之賜封戶二百授二子寵寓八品官由梁州還詔總後軍擢四鎮北庭行軍司馬充涇原節度使檢校兵部尚書在鎮四年訓練部伍儲藏饒衍平涼之盟伺知狡謀潛伏兵險道城得遁免優詔褒賚入朝除少府監工部尚書卒贈太子少傅

杜希全京兆醴泉人少從軍隸郭子儀為裨將積功至朔方節度使軍令整嚴士畏其威奉天之難首率兵赴之次漢谷為賊邀擊乘高縱石彊弩雜發德宗使援之不克還保邠州論功檢校戶部尚書行在都知兵馬使從幸梁州還遷檢校右僕

靈鹽豐夏節度使封餘姚郡王將卽屯獻體要八章切政病帝嘉納賜君臣箴一篇尋加太子少師夏綏銀都統建言鹽州據要會為塞保鄯自平涼背盟城陷於敵自是靈武勢隔鄜坊單逼深為邊患請復城鹽州乃詔希全及朔方邠寧銀夏鄜坊振武及神策行營諸節度合士三萬五千屯鹽州又救涇原劔南山南軍深入吐蕃牽撓其力使不得犯塞執版築凡六千人閱二旬畢中外稱賀寇於是懼不敢輕入自居河西久頗越法橫肆忌豐州刺史李景畧名出其右疑逼已遂排劾之又誣殺判官李起帝為容忍以風眩卒贈司空廢朝三日

朱忠亮字仁輔本名士明汴州浚儀人初為薛嵩裨將大曆中詔移普潤縣掌屯營開田峙糧有功擢太子賓客朱泚亂率麾下四十騎奔奉天德宗嘉之封東陽郡王賜定難功臣扈符梁



州為賊鈔獲繫長安獄賊平李晟釋之薦於渾瑊署定平鎮都  
 虞侯至鎮使憲宗立加御史大夫涇州將楊琦謀拒詔為亂不  
 克死乃授忠亮檢校工部尚書涇原四鎮節度使賜今名在鎮  
 能隱覈軍籍黜竄名者三千歲收糧料十餘萬緡惟耄卒得貸  
 戰士感奮涇俗舊多賣子贖還之以築潘原城有勞改封丹陽  
 郡王卒贈右僕射諡曰靈

李自良兗州泗水人遭祿山亂從兗郟節度能元皓以戰功授  
 右衛率又從袁傜討袁晁積伐試殿中監隸浙東薛兼訓幕府  
 復從鎮太原授河東押衙更事鮑防會回鶻入寇防令大將焦  
 伯瑜杜榮國將兵擊之自良諫以敵遠來其鋒未易爭且堅壁  
 勿動要其歸路築壘以待伺其求戰不得師老自旋從而阨之  
 策之上也防不從促伯瑜等逆戰遇敵於百井大敗而還由是

知名馬燧代防奏署代州刺史仍為軍候為人勤恪有謀燧深  
 委信之從破田悅又討李懷光皆為大將專河東軍前後戰績  
 居多燧立功名由其協輔力也貞元三年從入朝德宗欲以代  
 燧懇辭不敢忘本物議多之乃授右龍武大將軍入謝帝面諭  
 河東密邇邊戎難於擇帥卿於馬燧存軍中事分誠為得體然  
 北門之寄無易於卿即日申前命拜檢校工部尚書兼御史大  
 夫太原尹北都留守河東節度支度營田觀察等使在鎮九年  
 以簡儉守職軍民胥悅雖起戎伍動必循法畧不以暴戾加人  
 卒年六十三上甚嗟惜廢朝一日贈左僕射

劉昌裔字光後太原陽曲人幼重遲不好戲常若有所思度及  
 壯西遊三蜀說降楊惠琳即佐為瀘州從事琳死往客河朔曲  
 環方攻濮州表為判官授監察御史為檄諭李納開曉大義德

宗覽之嘆異從環鎮陳許加兼御史中丞克營田副使賜紫環  
 卒上官浼知後務吳少誠引兵薄陳浼欲遁去昌裔追止之曰  
 受詔守備死乃其職况城中士馬完奮糧又足支若堅壁不戰  
 五七日後賊氣必衰我可以全制之浼始有固志賊攻堞壞不  
 暇修密造飛棚聯棚隨輒補葺得不得陷分士千人出擊走賊  
 兵馬使安國寧潛謀應賊昌裔以計斬之名其麾下千人為饗  
 人賞二緡乃伏兵於道令持緡者斬一不能脫以功擢浼陳許  
 節度使昌裔陳州刺史賊不敢至其城下韓全義敗引軍來奔  
 且求入保拒以上命討蔡何故來陳舍之城外明日從十餘騎  
 持牛酒抵營勞軍全義不意其至迎拜歎服貞元十八年改陳  
 許行軍司馬浼卒軍中推之詔授檢校工部尚書賜以節鉞封  
 彭陽郡公命境上吏不得犯蔡人間有犯者縛送自治少誠慙

亦禁其軍無暴境上憲宗即位懲創藩臣自立之弊欲名之重  
 生變會大水壞城郭溺民人乘人心愁苦遽召還京師代以韓  
 臯為檢校左僕射兼左龍武統軍昌裔知帝意因稱風眩卧第  
 尋一贈潞州大都督諡曰威

孟元陽史失其何所人初從陳許軍起家至為大將理戎整肅  
 善部署節度使曲環檄董西華屯田盛夏芒屨督作親涉泥塗  
 役休乃就舍人咸樂勸田輒歲收軍食常足吳少誠來寇嬰城  
 固守外無救援終不能害賊遁去許城獲完韓全義敗列將多  
 私歸獨與神策將蘇元策宣州將王幹以所部屯潞水破賊二  
 千詔拜陳州刺史兼御史大夫元和初遷河陽節度使檢校工  
 部尚書五年加檢校右僕射徙帥昭義軍入為右羽林統軍封  
 趙國公改右金吾大將軍卒贈揚州大都督

韓全義素寒賤起家卒伍以巧佞事宦者竇文場擢長武城使  
素貪懦無紀律轉夏綏銀宥節度使以長武兵赴鎮衆譴言夏  
州沙磧無樹藝生業不可往其夜遂亂全義總城逃逸殺親將  
王栖巖趙虔曜等虞候高崇文誅亂首衆方定全義赴屯會吳  
少誠拒命德宗因用爲淮西行營招討使副以陳許節度使上  
官況諸鎮兵皆屬焉素乏方畧號令悉稟監軍賈英秀等每議  
攻戰分爭帳中不能決天方暑濕遇賊廣利城士皆病癘遂潰  
退保五樓賊移兵逼之入屯陳州宦人共掩其敗帝不及知少  
誠漫書求洗前咎宰相賈耽請納其誠帝然之全義班師過闕  
下託疾不入謁還屯夏州憲宗在藩疾之旣嗣位全義大懼願  
入覲獻女樂八人帝不納以太子少保致仕卒  
趙昌字洪祚天水人祖不器父賢皆有名於時昌始爲昭義李

承昭節度府屬貞元七年遷虔州刺史安南獠酋杜英翰叛都  
護高正平以憂死命昌代領安南十年薨落嚮化毋敢桀傲以  
足疾請還除國子祭酒代以兵部郎中裴泰未幾州將逐泰德  
宗召昌問狀時年踰七十占對分明帝奇之復拜安南都護詔  
書至交人相賀叛兵卽定憲宗初立授檢校戶部尚書遷嶺南  
節度使降轄陬荒以勞徙節荆南名入遷工部尚書兼大理卿  
出爲華州刺史時年八十五卒贈揚州大都督諡曰成

高崇文其先渤海人徙幽州七世不異居開元中再表其閭爲  
人性樸重寡言少籍平盧軍貞元中從韓全義鎮長武城治軍  
有聲累官金吾將軍吐蕃三萬寇寧州率兵三千往救戰于佛  
堂原大破之封渤海郡王全義入朝留知行營後務遷都知兵  
馬使議討劉闢拜兼御史大夫俾統左右神策麟游奉天諸屯

兵以往詔出顯功宿將。人人大驚。崇文先所練卒在長武城。卯漏受命。辰巳出師。器良械完。無一不具。且軍令嚴肅。士寓興元。有折逆旅七箸者。卽斬以徇。西出閬中。郤劔門兵解梓潼之圍。賊將邢泚退守梓州。已降。復貳斬以徇。關歸所執東川李康。以旬雪已罪。數其失守。誅之。闕城鹿頭山。旁連八屯。距成都百五十里。扼二州險要。以拒東兵。是日破賊二萬于城下。會雨不克。明日戰萬勝堆。堆直鹿頭左。使驍將高震寓鼓之。募死士冒矢石。板緣上。盡殺戍者。焚其柵。據于堆上。下瞰鹿城。八可頭數。凡八戰。皆捷。賊心始搖。大將阿跌光顏。以到營後期。懼罪請深入。自贖。乃命軍鹿頭西。斷賊糧道。賊大震恐。綿江將李文悅。以柵兵自歸。監鹿頭將仇良輔。執關子方叔。壻蘇彊。舉城降。蜀卒面縛投戈者數十里。崇文長驅而入。直指成都。其德陽等縣所屯。

重兵咸望旗。率服師無徭。行闕計無所歸。以吐蕃數受其賂。且將啓之。乃自領親兵及逆黨盧文若。賫重寶西走。崇文遣高霞寓。鄴定進倍道急追。擒於湧湍之中。併檻關與子壻送京師。王師入成都。屯于大衢。市肆不移。珍貨如山。無秋毫之犯。衣冠脅汗者。爲條上全活之。帝御興安樓受俘。論功大加爵賞。刻石紀功于鹿頭。崇文生平不通書。厭案牘。謔判不肯任吏事。屢詰扞邊。自力進同中書門下平章事。邠寧慶節度使臨行。恃功無憚。舉蜀帑藏百工奇巧。皆以自適。又不諳朝廷儀。憚於覲謁。優詔聽便道之。屯居邠三年。戎備修整。卒年六十四。廢朝三日。贈司徒。諡威武。會昌六年。配享憲宗廟。庭子承簡。少爲忠武部將。後更隸神策軍。以平蜀功。除嘉王傅。裴度征蔡。奏爲都押衙兼御史中丞。蔡平。詔析上蔡鄆城。遂平西平四縣爲潞州。拜爲刺史。

治鄆城始開屯田。列防庸。瀕澗綿地二百里。無復水患。皆爲腴田。賊先築武宮以夸戰勞。至則夷其丘。庀家財以葬。葺儒宮。備俎豆。歲時行禮。野有菽實。民得以飽。將吏立石頌功。遷邢州刺史。下戶苦征賦。急輒代輸。租又遷宋州。會李筠反。僞使數輩來責財。賦輒繫于獄。縛出斬之。威震部中。宋有三城。奔兵陷其南。承簡保北兩城。數與賊礮會。徐州救至。奔被執。兵潰遁去。擢左散騎常侍。充兗海沂密節度使。俄檢校工部尚書。遷義成軍。就加檢校左僕射。入拜右金吾大將軍。復節度。邠寧屬疾。還朝。道卒。贈司空。諡曰敬。

李光顏字光遠。與兄光進本回紇阿跌部。自少俱依姊婿舍利葛旃。學騎射。旃歸河東。事辛雲京。因家太原。兄弟同時奮起。咸嘆異旃。謂光進勇毅果敢。其武藝兵畧稍次于已。光進初從

馬燧救臨洺。戰亘水。收河中。皆有功。歷前後軍牙門將兼御史中丞。繼從郭子儀收兩京。授代州刺史兼御史大夫。封范陽郡公。食邑二百戶。上元初。子儀討大同。橫野。清。彘。范。陽。河北殘寇用爲都知兵馬使。尋遷渭北節度使。永泰初。封武威郡王。大曆四年。檢校戶部尚書。知省事。未幾。檢校刑部尚書兼太子太保。元和四年。王承宗范希朝引師救易定。表爲都虞候。戰木刀溝。有功。時光顏亦在行間。軍中分別呼爲大小大夫。六年。加銀青階。檢校工部尚書。充單于大都護兼振武軍節度使。詔稱夙有誠節。克著茂勳。賜姓李氏。八年。遷靈武節度使。卒年六十五。贈左僕射。光進性孝友。居母喪三年。不歸寢室。築墳城南原。將相致祭。咸以爲榮。時光顏先娶。委以家政。母卒。弟使奉管籥家財。歸于其姒。兄以母命不可改。仍反之。因相泣良久。復如初。元顏

天質雄傑。旃自謂不及。初爲河東裨將。馬燧解佩刀以贈。言汝有奇相。後必光大。討李懷光。楊惠琳。皆有功。高崇文平蜀。塞旗斬將。出入如神。名以益振。元和中。歷代洛三州刺史。兼御史大夫。本州團練使。王師討蔡。遷陳州刺史。充忠武軍都知兵馬使。踰月。遷節度使。檢校工部尚書。令率本軍。獨當一面。壁于澗水。裴度宣慰蔡。還。獨稱其勇。而知義必能立功。明年五月。大戰時曲。賊晨壓其營。而陣衆不得出。乃自毀左右柵。將數騎突入賊中。往來數四。賊識之。衆矢蝟集。其子攬轡諫止。揮刃叱之。士爭奮躍。賊大潰。死者數千人。時環蔡兵屯十餘。相顧不肯前。光顏獨先敗賊。捷至。上下稱賀。都統韓弘令諸軍齊攻城。賊忽先薄。烏重胤壘。重胤中數槍。馳光顏求救。計度賊已出。小澗必虛。遣大將田頴。宋朝隱襲之。果平其柵。弘以爲違令。命光顏

及朝隱將戮之。舉軍皆惜。二人材勇。光顏畏弘。不敢留。中使景忠信矯詔。令所在械繫走馬。入見。具聞本末。憲宗赦矯詔罪。卽令往釋。二將弘與光顏迭表論奏。詔諭頴等。違令當死。但以襲城有功。可贖軍。有三令。五申。宜暫捨以責來效。弘不悅。因與有隙。十一年。又屢困賊。遂拔凌雲。上大悅。賜告捷奴銀綵。進位檢校左僕射。會郾城守將鄧懷金。以光顏兵圍青陵。斷將吏歸路。謀于郾。令董昌齡曰。城中父母妻子皆質於蔡。有如不戰而降。則家屬盡屠。乃請光顏來攻。我舉烽求救。何蔡兵至。逆擊必敗。此時當以城降。光顏從之。十二年四月。大敗賊衆於郾城。死者三萬。其將張伯良奔歸蔡。於是昌齡執僞印。帥吏列于城外。懷金與諸將素服。倒戈列于城內。開門以待。其城自壞者五十餘步。光顏入。弘惡之。陰圖撓屈。計無所施。乃求大梁美婦遺之。

以盡其心光顏開宴集三軍卽於座上酬來使曰爲謝令公光顏事君許國之心死無貳矣今戰卒數萬皆背妻子蹈白刃獨奈何以女色爲樂言訖涕咽衆心益勵裴度築赫連城於方城池口軍騎往觀光顏策賊必至亟使田布伏二百騎於五溝中賊果大至注弩挺刃勢將及度賴以決戰於前度方獲免布先扼其歸路賊多棄騎越溝相牽而墜壓死者千餘人賊知光顏勇冠諸將乃盡悉精銳以當其師李愬由是乘其無備得入蔡州董重質棄洄曲軍入城投降光顏躍馬入營盡得其衆萬餘賊不加檢校司空入朝對於麟德殿賜金帶錦綵宴饋加等討李師道復徙鎮義成軍許以忠武兵自隨不三旬再敗賊軍於濮陽拔斗門斬數千級上言許鄭兵不可用復鎮忠武十四年因夏州田緡貪餒啓釁党項引吐蕃圍涇州詔移鎮邠寧時敵

毀鹽州城復令築之仍以陳許六千人從始料兵赴敵邠師恟威不肯行曲爲陳說大義言發涕流三軍感泣乃始卽路擊賊退之穆宗卽位就加特進與一子四品正官尋詔赴闕賜闔化里第進同中書門下平章事復還鎮長慶初轉鳳翔節度使將討鎮冀以得陳許士心仍領忠武兼深冀行營諸軍節度使赴日宰相百寮班餞帝御通化門臨送賜錦綵銀器良馬玉帶光顏以懸軍深入饋運不繼且滄景德棣等州賊方連結未可卒平恐一差跌前功悉棄乃稱病懇辭兼鎮果以無功赦廷湊等復還治所敬宗時正拜司徒於正衙受冊李弁叛復詔總師卽討營于尉氏弁誅遷太原尹開府儀同三司兼侍中卒年六十六廢朝三日贈太尉諡曰忠

烏重胤字保君父承玘別傳重胤少起行伍爲潞州牙將兼左

司馬善撫士卒與最下同甘苦吐突承璀討王承宗盧從史逗  
留不前命縛之密告重胤以詔命嚴敕潞軍無敢動者憲宗嘉  
其功擢懷州刺史充河陽三城節度使封張掖郡公招致名賢  
石洪居幕府李珣在麾下會討淮蔡割汝州隸其軍表珣行營  
都將卽引兵壓賊境與李光顏相犄角凡三年大小百餘戰賊  
平加檢校右僕射遷檢校司空封邠國公元和十三年徙橫海  
軍至卽舉所管德棣景三州各還名分歸其職業應在州兵並  
令刺史收管又請廢景州復弓高縣改歸化縣仍屬德州詔並  
從之及討王廷湊詔出兵屯深州自度朝廷號令乖迕制置失  
宜未可以歲月破賊久未敢進穆宗責其觀望詔杜叔良代之  
罷爲太子太保長慶末加檢校司徒同中書門下平章事充山  
南西道節度使召至京師復收天平軍文宗初真拜司徒帝

李同捷狂狡請襲父位不許恐其拒命思以重臣鎮之乃加重  
胤太子太師充海節度使兼領滄景仍割齊州隸之制出旬日  
卒年六十七贈大尉諡懿穆生平赤心事上率先奉法所至立  
功未嘗矜伐善待僚屬恩禮周至所降蔡將李端其妻被鬻殺  
猶呼其夫善事烏僕射其得人心如此旣歿軍士懷之至有剖  
股以祭者子漢弘嗣爵母喪固辭起復帝嘉嘆服闋授左領軍  
衛將軍 洪字濟川其先姓烏石蘭後省姓石爲人有至行舉  
明經調黃州錄事參軍罷歸東都隱居不出公卿數薦不赴感  
重胤知己欣然戒行授昭應尉終集賢校理 珣山東甲姓世  
習儒獨珣尚材武以弓馬爲務長六尺餘氣貌魁岸善使酒爲  
澤潞王虔休鎮將重胤愛其才終右武衛上將軍

王沛許州許昌人少勇決爲上官浣所器妻之以女署牙門將



況卒他壻田俛脅況子襲領其軍患監軍范日用不從謀害之  
沛竊知其謀密以告因盡禽其黨事聞德宗嘉美卽拜陳許司  
馬代者劉昌裔奏爲監察御史遣護況喪還京帝召見歎息曰  
卿忠義寵宜加等再授開府儀同三司兼御史中丞司馬仍舊  
李光顏討蔡奇沛風檠署行營兵馬使別統勁兵屯于近郊有  
詔趣進軍諸將觀望沛輒引兵五千夜濟合流口扼賊衝塹壘  
屯住自是河陽宣武太原魏博等軍繼渡圍郟城降鄧懷金蔡  
平加兼御史大夫復從光顏定淄青詔分許兵行戍邠寧沛又  
爲都將同救鹽州敗吐蕃以功擢寧州刺史徙陳州充忠武節  
度副使率師討李宓加檢校右散騎常侍轉充海沂密節度觀  
察等使時府新建俗獷鶩難治沛明示法令蒐闕及時軍政大  
治改檢校工部尚書終忠武節度使贈石僕射子逢少沉勇從

父征伐有功署忠武都知兵馬使太和中入爲諸衛將軍從劉  
沔石雄破回鶻於天德性果決用法嚴士未經戰伐輒不與常  
賜後從王宰討劉稹爲太原道行營將領陳許兵七千屯翼城  
稹平加檢校右散騎常侍父子同至忠武節度使卒

高霞寓范陽人其先五代不異居祖 父栖鶴皆以孝聞德宗  
旌表其門霞寓狡譎多變通春秋及孫吳兵法頗以感慨自尚  
往見長武城使高崇文異其才檄任軍職元和初兼御史大夫  
從討劉闢下鹿頭城降李文悅仇良輔等追戰七盤城有功賊  
平拜彭州刺史俄代崇文爲長武城使封感義郡王五年以左  
威衛將軍隨吐突承璀討王承宗獨破賊有功詔藏所獲鎧仗  
於神策庫以旌之拜豐州刺史三受降城都團練防禦等使討  
吳元濟析山南東道爲兩鎮拜唐鄧隨節度使遏賊南衝名雖

宿將徒勇悍寡謀畧統制尤非所善始引兵趨蕭陂戰小勝進至文城柵爲伏兵所掩遂大敗僅以身免詔貶歸州刺史乃厚賂權宦召爲右衛大將軍轉振武軍節度使浚金河漑鹵地數千頃會吐蕃攻鹽豐二州引兵五千屯拂雲堆蕃引去加檢校司徒節度邠寧疽發卒于道贈太保  
盧從史其先自元魏以來冠冕盛族後徙籍不常父虔好學由進士歷御史秘書監從史少好騎射遊澤潞間節度使李長榮署爲督將以姦獍得衆心又善逢迎中貴長榮卒得授昭義節度使在鎮淫縱不道而能辯給粉澤其非府屬孔戡等累諫不從皆引去元和中父喪去官陰伺帝旨卽獻計請討王承宗遂奪服領澤潞勒兵逗留陰與敵交得其密號授軍中故高芻粟價直以要度支利歸于已上書求兼宰相反誣諸軍與賊通兵

不可進憲宗患之用宰相裴垍謀令吐突承堆之會從  
承堆對壘時過欽博因多出寶帶奇玩夸詡自  
狎不疑承堆伏壯士其來與語博力辱承堆者驚噪斬  
數十人諭以密詔賴大將  
慰軍士暴從史罪惡貶驪州司馬  
高瑀冀州蓆人少沉遂方雅喜言兵長景右  
遷陳蔡二州刺史入爲太僕卿故事朴沿擇  
貨鉅萬多假貸至則椎膏斲血倍以酬息十常六七太和初王  
沛卒文宗新政宰相裴度韋處厚獨推瑀有  
僞欲任之會有表至亦句瑀卽授檢校左散騎常侍忠武軍節  
度使自是債帥頽風遂革州此水旱爲相地築隄庸百八十里  
時其鍾洩民賴不饑就加檢校工部尚書至右僕射徐州專殺

李聽柳公綽病亟語不及他名故吏白宰相非高瑀不能定乃  
改鎮武寧軍人心寧謐徵爲刑部尚書辭去拜太子少傅分司  
東都不閱月仍復忠武卒于鎮贈司空爲人性寬和有體量居  
官無赫然譽所至稱治士人懷之

劉沔字子汪彭城人父廷珍蒞羽林軍以扈德宗奉天戰功官  
左驍衛大將軍封東陽郡王沔少孤客振武事范希朝署牙將  
爲所器重謂沔後日必處吾坐卒後入爲神策將從李光顏討  
蔡爲前鋒破驪軍得其力隨入朝因留宿衛歷鹽州刺史天德  
軍防禦使在西北累立奇功太和末遷十八將軍擢涇原節度使  
屢誅河西党項叛羗加檢校右散騎常侍封單于大都護振武軍  
節度使開成三年突厥劫營田沔發吐蕃契苾沙陀部萬人擊  
之一轡無返悉頒鹵獲馬羊于戰卒築都護府西北四壘進檢

校戶部尚書會昌初回鶻鄯饑烏介可汗奉太和公主至漠南  
求食過把頭鋒寇天德詔以兵據雲伽關遂引去二年又掠太  
原振武武宗使兵部郎中李拭調兵食四視諸將能否拭獨稱  
沔進檢校左僕射河東節度使與幽州張仲武協力招撫回鶻  
詔追之以功加檢校司空金紫光祿大夫賜一子官御書李靖  
平頡利事以賜軍還次代州有歸義軍降口三千使隸食諸道  
不聽據淳沱河叛悉禽誅之又詔南討劉稹屯榆社素與仲武  
不協時方追幽州兵故徙義成李德裕因王宰逗留表沔鎮河  
陽以滑兵三千壁萬善居宰肘腋下激之使平進檢校司徒忠  
武節度使有病不任謁拜改太子少保加太子太傅致仕卒年  
六十五贈司徒生平遇血戰幾死者數四嘗傷重卧草中月黑

不知歸路。夢人授之雙燭，曰：此行無患，子方大貴，可持此還。自此遇危難，及破敵，炯然有雙光在前。器鎮後，光息乃終。

石雄，徐州人，少出寒微，爲牙校，敢毅善戰氣。蓋軍中王智興討李同捷，收棣州，以爲右廂捉生兵馬使，先驅渡河，鼓行無前。復善撫士，徐人服之，而惡智興苛酷，謀逐之。以立雄，智興懼，變表雄有功，得外補，詔授壁州刺史。旣去，智興盡以雄所善百餘人，誣以搖亂軍情，請置于法。文宗素知其能，不以流于白州。尋徙陳州長史，党項擾河西，召隸劉沔軍爲偏裨，以有勞，以智興故，久不擢。至武宗時，始授天德防禦副使，兼朔州刺史，佐劉沔屯雲州，沔召與謀。部落離散，分當掃除，久矣。朝廷以公主故，不欲亟攻，今若徑趨其牙，彼不及備，必棄公主走，我當迎主歸。有如一捷，吾等死之。雄曰：諾。卽遷沙陀李昌及契苾拓拔

雜鹵三千騎，夜發馬邑，旦入振武城，登陴望鹵營，不遠，見屬車十餘乘，從者咸衣朱碧，謀者曰：此公主帳也。雄潛使喻之曰：天子有詔，令迎公主，兵合，第無恐動。乃穴城夜出，縱牛馬鼓譟，直搗烏介帳，可汗大駭，單騎遁走。追至殺狐山，斬首萬級，獲馬牛羊不貲，遂迎公主而還。以功加檢校左散騎常侍，豐州刺史，兼御史大夫，天德軍防禦使。會討劉稹，李彥佐逗留不進，遴爲晉絳行營諸軍副使，以助之時。王宰屯萬善，劉沔屯石會關，亦顧望莫先。雄受命，卽勒兵越烏嶺，破賊五壁，斬獲千計，賊大震。捷聞，武宗大喜，以今將帥罕雄比者，就加檢校左僕射，河中尹，晉絳行營節度使，以代彥佐。稹勢危蹙，其大將郭誼密獻款，請斬稹，首自歸，衆疑其詐。雄昌言曰：稹以誼爲謀主，今天奪其魄，謀出本心，又何疑焉？乃令以兵薄潞，受誼降，兵始入，大掠，誼移書

責之既而誼黨盡擒賊遂平帝以始末有功加檢校司空詔書  
褒美徙河陽三城節度使宣宗立又轉鳳翔素為李德裕識拔  
智與子宰有隙數欲沮陷會德裕罷白敏中謂黑山天井功所  
酬已厭乃代歸拜神武統軍失勢怏怏而卒為人沈勇好義臨  
財廉每破賊立功朝廷特有賜與輒置軍門自取一縑餘悉分  
士伍以是衆感發無不爭奮平潞時見一白鷺在水語衆曰使  
吾躬中其目當成功已而果然

曹華宋州楚丘人始從董晉宣武軍縛李迺送闕署為牙將會  
吳少誠叛推華驍果有智算選守襄城修埤浚隍屢敗凶醜憲  
宗召見特賜旗甲繒錦拜檢校右散騎常侍寧州刺史未行元  
濟復叛河陽烏重胤奏為懷汝節度行營副使前後數十戰大  
敗青陵城拔凌雲柵賊平封陳留郡王授棣州刺史棣鄰於鄆

屢為李師道侵逼招募羣盜補以軍卒分據要路賊至皆擊敗  
之鄆人不敢北顧時以王遂被害命代為沂兗海觀察使至鎮  
三日開宴羣校畢集喻以上旨憫諸將士分割有轉徙勞特恩  
頒賜須合區分凡鄆卒處右州兵處左分別已定闔門令州兵  
出外獨留鄆卒詰其前害主帥預伏甲士令出環之凡斬一千  
二百人血流成渠門屏之間有赤霧氛起高丈餘良久方散自  
是海沂之人重足股慄無敢為盜者又惡沂地福許移理所於  
兗下令鄆魯舊禮義鄉不可無教自李正己以來垂五十年民  
俗頑驚及是躬禮儒士習俎豆之容春秋釋奠孔廟立學講經  
儒冠四集出家財贍給俾成名入仕往者如歸復表請率軍討  
害田弘正罪加檢校工部尚書昇兗海為武寧節度授之節鉞  
李宥叛不俟命赴討宥方遣兵三千取宋州迎擊敗之由是宋

毫不敢從亂事平論功進檢校右僕射河朔復拒命移為滑州刺史義成軍節度使卒於鎮年六十九贈司空生平雖出戎行動必由禮尤重士大夫未嘗以富貴驕人下迨僕隸走使之徒必待之以誠信人以為難

郝玘者涇原戍將貞元中移臨涇鎮將為人勇敢在行間前無堅敵兼有謀畧以臨涇地居險要正當敵衝其川原饒衍利畜牧迤西數百里皆流沙無水草請於節度使馬璘願城之以為休養便地會有說璘以公方蒙恩大幸正為邊防未固上心日夜念此故厚於公今如玘言邊陲已安無所用公璘遂不聽乃說後帥段佐曰天寶時天下以兵為防獨西戎耳自祿山反西陲盡亡寰內為邊每敵入寇驅父子掠馬牛焚積聚殘室廬邊人耗盡今若築臨涇以析敵勢甚為利便佐乃請于憲宗得命

元和三年城完賜名行原州以玘為刺史戍之自是賊不敢過臨涇在邊三年每討伐不持糗糧取之於敵獲俘取尸劊剔而歸西人大畏呼其名以怖啼兒遷檢校左散騎常侍兼御史大夫充涇原行營節度平涼鎮遏都知兵馬使封保定郡王贊普常鑄金像等其身令曰生得玘者賞之朝廷畏失驍將徙為慶州刺史卒 佐亦勇敢知名本郭子儀牙將征伐有功在涇原練卒保邊敵畏憚之終右神策大將軍檢校工部尚書卒

史敬奉靈武人少從朔方軍為牙將形甚短小類不勝衣至於野外馳逐能及奔馬自執鞚勒隨躍而上然後羈帶矛矢在手前無疆敵以甥姪僮僕二百人為部曲每出輒分為四五隊隨逐水草數日各不相知已而相遇各皆有獲元和十四年吐蕃犯塞請於節度使杜叔良子兵二千齎一月糧深入邊地行十

餘日不聞音耗皆謂已歿敬奉乃由間道繞出敵後出其不意  
部落驚潰因大破之殺戮不可勝計驅其餘衆於瓠蘆河獲馬  
牛雜畜萬餘賜實封五十戶與郝玘并鳳翔將野詩良輔皆以  
名雄邊良輔後移隴州刺史吐蕃疑朝廷不與約和問故荅曰  
以任良輔隴州其畏憚如此然亦竟不能北踰白道西出蕭關  
以振十九郡生民君子惜之

弘簡錄卷四十四 終

